

遼陽縣志

戊辰夏  
比頌



古蹟名勝志卷六

遼陽古爲名區宮殿城堡臺鋪各名稱見於前志者甚夥惟歷代改革故址難詳父老鮮能徵者然不考古無以證今今之古即古之今後之古即今之今生長於斯習而不察概聽其日就湮沒焉可惜孰甚爰即見聞所及采而列之疑者存以俟考述古蹟名勝志第六

遼宮殿 舊在城東北隅高三丈南爲三門壯以樓觀四隅有角樓相去各二里宮牆北有讓國皇帝御容殿按今城內東北金銀庫馬神廟一帶地勢甚高相傳明李總兵成梁花園亦在此地清季徐姓挖土曾得金盃於馬神廟前盛大時人不能戴殆遼時遺物也

東丹王宮 通志云在城東北隅舊有大東丹國新建南京碑銘今碑已無存

金宮殿 在城北金皇統四年建寢殿曰保寧晏殿曰嘉會前正門曰天華後曰乾貞又建宗廟有孝寧宮七年又建御容殿今皆無存故址當在土城內東園保寧寺等處

報德殿

金史正隆六年世宗即東京清安寺建神御殿以奉貞懿后後又改爲報德殿

詔翰林學士張景仁作清安寺碑文復詔石琚共修之按清安寺當即今白塔寺

奉慈殿

金史正隆六年世宗深念貞懿后遺命詔有司增大舊塋起奉慈殿於塔前勅

禮部尙書王競爲塔銘其故址當在今白塔前廣佑寺

神御殿

金世宗初即東京垂慶寺起神御殿寺地褊狹詔買傍近民地優其值不願鬻

者以官地易之考金史貞懿后自建浮圖於遼陽是爲垂慶寺世宗拓其地以建殿自

與浮圖相隣比意其故址即白塔寺南之西會寺地又名前寺

東京城

清初都城在太子河東距城五里餘天命六年築城同時建宮殿城周六里零

十步高三丈五尺東西廣二百八十丈南北長二百六十二丈五尺門八東左曰迎陽

右曰韶陽南左曰龍源右曰大順西左曰大遼右曰顯德北左曰懷遠右曰安遠十年

遷都盛京遂以城守章京守之康熙二十年章京移駐金州迄乾隆間遂廢今新城村

故城基也村中土山巔柱礎猶存城垣圯毀矣

右列東京各門据盛京通志考遼陽州志云城門八東門二二曰撫近一曰內治西門二一曰懷遠一曰外攘南門二一曰德盛一曰天祐北門二一曰福盛一曰地載號曰東京與此不同惟州志成於康熙二十年時距開國較近自必確有可徵通志所載殆係日後改定耳

東京宮殿 清初創建在東京城內天命十年遷都瀋陽遂以管理驛站章京守護之日後折毀今尙存柱礎

白虎殿 在千山清太祖駐蹕之處

平州城 在城東四十五里漢末公孫度稱平州收魏克公孫淵置平州今下平州東山上有名台山子者即古城遺址城方可里許

巖州城 在城東六十里高麗白巖城唐以其地爲巖州遼改爲白巖軍金初改屬石城今石城山下尙存遺蹟興定間以靈巖寺爲巖州又置倚郭縣曰東安即今山上石城也俗呼巖州城因以名村城址及城中點將臺猶存俗傳唐征高麗泉蓋蘇文守此久

攻不下乃繫礮雀尾縱之入城射以火箭糧草盡焚城遂破然考唐書顯慶三年詔程名振征高麗薛仁貴副之戰於石城有善射者多殺官軍仁貴白衣單騎突擊賊生擒之是則縱雀之說荒誕不足信矣

安平城 在城東六十里大安平村晉安平縣故地村東有遺址土人呼爲後城

高麗城 城東十八里有村曰高城子即高麗城之簡稱也高麗據遼東時所建形方如臺每面廣四丈許以巨石砌成

遼東京城 遼天顯十年改遼東故城南京爲東京金爲東京路領遼陽鶴野宜豐石城四縣末年廢

爛泥鋪城 即城北三十五里爛泥鋪村故城址無存村人掘土常得古代甃瓦

山藥鋪城 城北五十里有山藥鋪村爲古城舊址不知建自何時

黃泥窪城 城西北五十五里九區界黃泥窪村城故址尙在已平夷矣

姑嫂城 在城東六十里安平西北山巔方數丈未詳自何時始建

襄平城 全遼志云在遼陽城西北隅定遼左右後三衛治

女真城 全遼志云在城東北東寧衛治

高麗城 全遼志云在城東南隅定遼中衛治

渤海城 全遼志云在城東北隅定遼前衛治以上四城併爲遼陽

按今遼陽城即襄平城故地女真高麗二城當係遼境外屬時所建之屬城渤海城係遼時建遼遷渤海國民於遼陽僑置其民於此城明修全遼志必確見各城之故址非臆度也遼史及續通典謂遼陽即渤海國都不知渤海五京皆在今吉林境金氏文獻徵略考證頗詳不贅

石城 在城東四十里明定遼前衛軍屯相傳渤海王太子之居殊無可據

舊遼陽城 全遼志在瀋陽西北八十里今在境外現無可考

舊遼陽縣 據清一統志漢時遼陽縣應在今渾河太子河交會處蓋至唐時已圯故另置縣全遼志云在都司治之東作爲軍營即今城內

豐縣 全遼志云遼城東南八十里今安平鑛山有行省碑今廢 按今安平有城其南弓長嶺有鐵鑛近年中日開採尙有舊時開採遺跡云

杏氏故城 一統志云在遼陽境內今未詳

居就城 在城西南按前志云居就糧梁水魴言特產也今城西南陶官屯一帶秔米最佳清代用充貢品曰桃花米漢置居就縣當即在此

甜水站城 城東南九十里甜水站有土城城四門方里許今已頽僅存遺蹟村居城內嘗有人於西門外得銅印一方篆文有咸平城印四字現又遺失前清設驛站於此按咸

平城今開原地土人因得此印遂以甜水站城爲咸平城姑存以俟考

高麗城子 城西六十五里今爲村名高麗據遼東時建此城今高麗城子村北有東西土岡高皆二丈許其故址也

船城 城西六十里八區界有大小船城二村即古船城也蹟已無存

唐王寨城 在城西南九十里現名唐馬寨有古城舊基人呼爲城上唐征高麗曾駐兵

此地因以得名焉

後城子 城北五十里有村名後城子相傳唐時曾在此設城堡地當遼瀋通衢自清設十里河驛此城遂廢今村外東南西三面皆有土岡村人挖土時獲古瓷古瓦娘娘城子 距城西六十五里城址已頽今爲村名命名之義未詳

古城子 在城西北六十里今爲村名有溝長二里許環衛西北南三面村內有土岡人呼爲臺岡原係甄砌後被居民折毀甄大逾今甄六七倍居民掘土曾得古瓶一對及古錢錢文鏽澀不可辨識蓋韓人遺物

山城山 在千山南距城八十里城在山巔頗高峻壘以巨石方廣數丈城外有石窩二深二尺徑尺許相傳爲建旗之窠白建自何代未詳

摩雲山古城 在城南摩雲山之巔四周皆用巨石堆砌方三丈許土人曾於石城外得古刀已折矣

鶴野城 在今城西八十里本居就縣境唐時渤海置雞山遼改鶴野以丁令威化鶴名

之也故址無考

宜豐縣

遼置衍州附郭州金改州爲縣元省入遼陽路按遼史近東梁河故址未詳

興遼縣

通志云在遼陽西南遼時改建遼史地理志本漢平郭縣渤海改爲長寧縣屬

遼陽府金時廢故址無考

衍州

遼置衍州安廣軍領宜豐金併州入縣通志云在遼陽西南

湯州

本漢襄平縣境遼置湯州遼史云在東京西北百里殊未可考

唐壘

全遼志云遼陽西有高城唐太宗屯兵之所疑卽今高麗城子

一堵牆

全遼志云遼陽西八十里梁水河東岸定遼左衛軍屯卽今邊牆子

東寧衛

首山西南村名東寧衛疑卽明時東寧衛軍屯

東京衛

城東十五里瓦溝子村清都東京城衛兵屯此

西樓

全遼志云在遼陽境內遼阿保機建門東向月朔會諸部落於此其東千里有東

樓北二百里北樓南樓在木葉山歲時射獵於其間至明廢

皇華亭 清太祖迎景顯及孝慈后梓宮奉安東京陵至此即今接官廳

首山堡 首山下有村曰首山堡清初設堡於此

八里莊堡 在城西有古牆一堵村人掘土曾得蒺藜礮一窖此堡蓋古之營壘也

沙河堡 在城西南三十里有古城牆遺跡方里許現南門尙完好清初設外委一員駐此相傳古爲白水灘青面虎爲寇即在村南之廟兒山或曰在首山者事屬附會無可考徵

鞍山驛堡 在西南六十里西距鞍山約三里堡爲磚城每面里許有西南東北二門明時曾設驛站於此駐巡檢一員相傳堡爲清初所建西南門外舊有鞍山驛堡四大字今墻已頽毀字跡無存

劉二堡 城西南四十五里有村名劉二堡巨鎮也考之通志明末曾設堡是爲堡名所由始又劉二堡河北關帝廟康熙十年碑載爲新劉堡至今堡中劉姓最多且爲望族想因此得名耳

穆家堡 在城西南六十里有古堡遺址唐時所設土人呼爲城墻實堡壘也

接官堡 在城西南六十七里古堡址已圯村中靖邊寺清初碑載名接高堡

大董山堡 在城北五十里即今之大東山堡村中有關帝廟碑載名大董山堡此堡設

自何代未詳

三家寨 在城北八里即今蕭夾河村考該村乾隆年間契紙坐落三家寨因村中舊有

蕭張劉三戶而得名

煙狼寨 在城西五十里清初州治境西至此地古時曾在此屯兵

牡丹寨 城東耿家屯湯河左岸今俗呼爲憐牛寨

帽兒寨 距城東三十五里耿家屯後湯河之右崖上有圓凹十數大徑尺即古寨遺跡

孫家寨 在城東湯河西村西北倚山東面地勢平坦未詳何代設寨並無遺址

八谷寨 在城東南七十里今爲村名四面皆山因古時屯兵故名

柳條寨 在城北四十里今爲村名地勢平坦亦因屯兵得名

克立寨 城東北三十里亦古時屯兵處今爲村名

首山古臺 踞首山之巔四周砌以甃石高廣方二丈有餘唐時建

調軍臺 城南四十五里山頂有古臺遺址昔時人曾在此調軍故名

景遷臺 明一統志云在城內元權府事洪革建革有志於學慕孟母三遷之教故名故

址不詳

蝸臺 明一統志云在城外東北隅金大定中修城毀台取土得石函啓之中有塊石圓

滑天成搖之作聲破之有二代蝸尾相鉤見風即死今故址無存

釣魚臺 城東九十五里韭菜峪西北黃泥崗南藍河西岸有天然方形巨石東西南三

面峭壁不可攀躋惟北面可登面積丈餘上有石廟一座松樹一株西南角有石磴可

容一人坐釣因名爲釣魚台又明全遼志云城南三十里有釣魚台相傳爲渤海大氏

遊觀之所程啓充千山遊記謂係屯兵處今調軍台村尙存台址當即昔之釣魚台也

老大台 城東二十五里台在村南山

台子溝 城東十五里台在村東山

黑鷹台 城東五十里

尖台子 城東三十五里

望寶台 城東南三十里

商量台 城東南九十里台在村南山

後台 城東南七十里台在村北山名古台山

洪台溝 城東南六十里台在村中

孔姓台 城東南四十里

陳家台 城東南三十里

調軍台 城東南三十五里台在村東山

倪家台 城東南六十里

廟爾台 城東南六十里

四方台 城南六十里

谷首峪台 城南六十里台在村東

土台子 城西南二十里

小台子 城西南五十里台在村中一座村西一座

雙樓台 城西南五十五里台在村西

祁二台 城西南四十五里台在村東南

韭菜台 城西南五十五里台在村西北

烏龍台 城西二十里台在村東北

夏家台 城西二十五里台在村北

趙家台 城西二十里台在村西北

興隆台 城西二十五里台在村西

南大台 城西劉二堡河南台在山東營北

東大台 劉二堡東堡村外二里村人呼爲東大台

西地南台 在劉二堡北西地村前村人呼爲南台

高莊子台 城西四十里台在村西北燕子溝東南

喬家台 城西七十五里台在台南陳家村北

望寶台 城西十二里台在村中關帝廟東

沙嶺台 城西北二十里台在村西

雙台子 城西北三十里台在村西

二台子 城西北五十里台如古城垣圍繞村外

二弓台 城西北六十里台在村西由此村西南五十里一村村西皆有台以次數二三

四五六七八皆名弓台均在太子河東

黑溝台 城西北七十里

星台子 城北十五里台在村北

商家台 城北三十里台在村西北里許

小北台 城北四十五里台在村西古村名寶興台

朱官台 城北五十五里台在村西北

宛家台 城北四十五里台在村中

小東台 城北六十里村南古臺三座

連山台 城北六十里

望水台 城北十里台在太子河南村西北

小烟台 城北三十里

馬峯台 城北三十里

張台子 城東北二十五里台在村東

邵二台 城東北四十里台在村東

大路烟台 城東北五十五里台在村中

按境內古臺甚多相距五里或十里八里多半頽廢東南半因山岡堆砌西北平行皆築土爲之不詳創自何時大約始於漢晉至唐增多爲行軍烽燧斥候瞭望之所詩云千古河山戰一枰縱覽輿圖慨然如覩古戰蹟焉

遼海亭 舊在城內金時高士談詩云殘雪樓臺山向背夕陽城郭水西東結句云自歎不如華表鶴故山猶在白雲中又張解詩云晴光搖碧海遠色帶滄洲今故址無存或謂在回回營

華表仙莊 前志云丁令威學道仙去城內舊有石柱道觀名曰華表仙莊後改爲倉今已無存

華表柱 城東六十里華表山有石峭立名曰華表柱或謂丁令威化鶴處殊無確證

觀音洞 在千山西俗稱佛爺洞洞口當山腰經人工修鑿高可丈餘上鑿古佛洞天四字內方丈五六尺奉觀音大士像座後石壁有窟徑三尺据僧云昔時洞窟長半里餘甲午之役居民避難洞內數百人後經雷震洞遂塞前廟有雍正四年重修碑記不知

建自何代近年又新建配房輪奐可觀門外有巨石當途刻字云接引石据云取引入西方成正果寓菩薩渡人之意

朝陽洞 城南五十里柳河湯村北洞幽邃曲折可入數武後兩壁石紋如龍虎作盤曲迴顧狀洞內冬令極熱入洞俄頃間即汗流浹背再進丈許有石如椅似曾古隱士跌坐處曲折再進仍未到盡頭或云可通黑黃洞洞前有石室方廣二丈許中住尼僧西面石壁圓窗徑三尺餘室西有廟三楹碑載康熙壬午年建

黑黃洞 城東三十五里石咀山有石洞二石色一黑一黃二洞口相距三丈許相傳中間相通長三十里通朝陽洞好事者持燭探之初入須匍匐行再進則寬廠半里許道坡下有風恐燭滅不敢再前取石隨坡擲之響許久澎然落水忽聞有人云勿擲石下面有人擲者惶駭乃出据土人云

雪山洞 城東南百十里上老母溝聖水寺有洞在山麓名雪山洞初入洞如斗室中有水池室壁間有洞冬煖而夏涼見葦及穢物泉遂竭僧人焚香禱經祝之泉流如故屢

驗不爽光緒乙未奉軍營務處涂總理景濤稗衡曾帶從人數名登梯持燭入洞途中  
聞震動聲又有大風遂止因賦詩云扶筇入雪山微見雲根裂石室本天成神工信奇  
譎中空約尋丈苔縫流泉洩仄出流作池飲之甘且冽昔人已羽化我來實怡悅老僧  
笑致詞此境猶非絕懸梯載斜上捫壁有靈穴窟曲羊腸迴棧森虎牙噉然燭作前導  
大聲忽雷駭從北強隙窺黑暗不能測會須潔已進重來訪丹訣

嘯韻測韻下尚有脫  
句述者不復記憶云

冷洞 千山中會寺之西巖石壁間有古洞洞口高六尺餘深不可測入洞則寒氣凜冽  
故曰冷洞從未有入深入者

懷王寺地洞 懷王寺原係耿懷順王仲明家廟相傳其孫精忠圖謀不軌建此爲宮殿  
後敗露乃改作佛殿並在佛座後預掘地洞隧道通高麗門外以備逃亡事後被人將  
洞杜塞其說本無確證但高麗門外太子河坎被水沖刷之土崖露出六七尺高洞口  
究竟是否直達懷王寺因中間淤塞無從深探一說謂河崖之洞是洩水之道由門下

出者其說近是

羅祖洞 城東太河寺山北有洞深一丈六尺內分列十八洞奉諸神塑像上面另有洞口側身可上若層樓然羅祖像在焉明宣德六年碑記名其洞爲水蓮觀音洞清咸豐六年碑載有開山羅陀僧參修於此後修成正果遂稱爲羅祖洞洞南壁間相傳有避水珠以鎮河後人以紅泥丸易之

鞍山石洞 舊堡村南鞍山東山坳有石洞口東向始入須屈身而下再進數武方廣可五六尺光緒甲午有軍人四五名持燭入行半里許恐怖不敢前而反究未測洞之所至也考此山鐵鑛現經振興公司開採此洞當是昔年鑛坑始自何代則不可考

龍坑 城東十五里台子溝村東山名龍王頂山上平面積數畝中有坑七十二土人呼爲龍坑又陡起一峯頂有平石呼爲龍王頂山水由坑底石縫下注暗入山西根石井井深不過二尺村人取之不竭遇雨天輒聽水聲潺湲每屆嚴冬侵曉時坑內蒸氣氤氳形如白練及傍午日光漸強其氣始散

龍王泉 城南小嶺子村東南龍王廟前有泉冬夏不竭人呼爲龍王泉

雙泉 千山仙人臺東北山腰有二井相距兩步許水味一甜一苦歷試不爽上有廟曰

雙泉觀

八角井 城東南柳河湯北岸廟院有石井砌作八角形人呼八寶琉璃井有人在井上重頓足水即沸泡緣水係溫泉熱極則沸加以頓足震盪自必起泡無足異也其南數百步即湯池

八卦溝 城南四十里八卦溝村有水溝橫貫東西相傳溝中有巨石在水平面上有八卦文歷歷如鑄每遇大風雨或火水災變必先呈溼暈黑紅各異象歷驗無或爽者村人異之因以名村日俄之戰俄軍掘出欲載歸不果嗣逢山水暴發迅流衝下不知淤陷何處

轉水湖 城東六十里韓家砬村東有轉水湖因太子河水流至山根石砬反激回旋遂成漩渦故名崖上刻轉水湖三字無欵識年月

響水峪 城東百二十里商家臺韓家堡子村東七里許半山中有飛瀑水聲聞數里因名爲響水峪是爲藍河發源由飛泉側面觀之內有石洞可容三十餘人並有石桌一俗傳爲古之雲蒙山水簾洞殊無所據

抓魚坑 城南谷首峪東南櫃子山杈把砬子下有抓魚坑方圓里許坑水四時不涸冬不凍內產四足魚無鱗有鰓約三寸許形如馬蛇坑在山坳水色甚綠

天河泡 城東南牛蹄厓大東溝北山巔有水泡方圓丈許水色綠不涸不凍亦產四足魚

白雲泡 城南雞爪山即白雲山山巔有水泡名白雲泡亦產四足魚緣遼東山脈自白山而來雞爪山即長白之少祖山也長白山巔水泡產四足魚山係一脈故魚亦同種手山 即首山一名駐蹕山山上有台俗呼爲斗因山南坡有石上手印及山東北麓石上有手印坐印各一又名手山蓋好事者鑿之俗傳謂薛仁貴所按手印誠不值一噓矣又北有頽垣一角俗傳謂三皇姑尼菴尤荒誕不經惟山之東坡觀音閣後有桃一

株高一尺五六寸每年以結實之多寡驗年歲之豐歉歷驗不爽果實碩大核無皺紋俗呼爲仙桃由清初至末葉並未高長至光緒三十四年枯死至今枯株猶存

虎皮松 首山清風寺後殿前石級旁有松高二丈餘皮青白色似楊枝鍼與他松同有名爲麒麟松者寺僧呼爲虎皮松中外人來遊者皆莫能名焉聞諸住持蓋鄉前人梁半農手植云

邁山 城西南二十五里一名麥山子係南北岡形南巔有古廟百餘年來廟後山頂漸高起其上有足跡長尺有咫殆好事者鑿之作爲紀念後遂訛傳爲薛仁貴履痕云

鞍山 即城南六十里與海城分界處形如鞍故名

窟窿山 千山南即通明山山巔有石門廣可通車遠望成圓孔故名俗傳亦爲薛仁貴遺跡

廟嶺 城東下瓦溝子村南山名上有石大如磨盤上有足跡及馬踏印各一俗傳亦爲薛仁貴遺跡

帽兒石 城南倪家臺村後東山坡下有石名帽兒石俗傳薛仁貴在此休息無地拴馬  
乃以石壓馬韁置帽石上殊屬荒誕此石用七人力推之可搖動雖五牛之力不能牽  
倒

拴馬石 城東南老君堂琵琶嶺側有石上有窟窿如拇食二指捏痕可拴馬因名愚人  
亦附會爲薛仁貴手蹟云

考唐書薛仁貴本傳副程名振征高麗副鄭仁泰定天山功頗著然不過一戰將耳後  
世小說附會夸而無稽愚人未嘗學問誤以爲真故土諺有曰手山撲一把邁山跨一  
卡鞍山上了馬踢翻帽兒寨射穿窟窿山瞭甲山瞭了甲雖係崇拜英雄作爲紀念之  
意而傳聞失實不可不辨

紅寶石山 城東北七十里二區界山形如臥牛前倨後卑與三塊石之南山一石相遙  
對該石上鐫月痕人稱之爲犀牛望月山東腹部有清額駙和合禮未葬墓之斷碑山  
之土石皆赭色因名爲紅寶石山山巔原有石曰今無存矣

落虎莊石 城西七十五里大落虎莊前有水泡約百畝泡之南有紅石一方徑二尺餘相傳昔曾有虎踞其上因以名村有好事者欲移石村中掘地深丈許愈深根愈大用九牛曳之屹立不動石北丈餘有泉二眼夏日飲之甘涼無比城西二百里內無山此石來自何處殊難索解

官寶山 城南五十里山有六景一曰人峯西鎮原名人頭山一曰雉堞東環俗名東石城子一曰馬樁北峙有石如樁俗名拴馬樁一曰魚浦南流有泉經冬不凍俗名暖泉一曰龍松高臥原在砭石上盤曲如龍俗名龍松一曰虎石常蹲山麓兩石俗名虎石峨嵋山 城東峨嵋莊河南山勢橫列如眉村以此得名俗誤爲糯米莊又訛爲鵝眉莊橫山之南東曰大頂子山中曰蘑菇山西曰太平山山頂皆有土台太平山南麓有石洞及土岡兩道

對樁石 城西南七十里有村曰對樁石村後雙峯對峙山巔各有石高五六尺遠望如樁据土人云原係天然成形日久東山之石頽好事者又重立之

將軍石 首山東南坡有三石屹然並立望之如介冑將士儼然可畏土人呼之爲將軍石云

小常山 城南小打白狐村後有山不高圍繞全村形如長蛇前對團山俗稱爲龍戲珠云

紗帽山 城東六十五里三家子村後山形如紗帽山頂有松如簪花然亦天然奇致也  
一擔山 城東八十里華表山下二山相距里許形勢略同高五六丈方廣如之與諸峯不相聯屬故名爲一擔山

喇嘛塔 在南門外蓮華寺清初白大喇嘛葬此天聰四年立碑尙存

白塔 城西北半里許有塔十三層高四十八丈五尺三寸塔南爲廣祐寺有天聰九年重修碑記謂寺創於漢同時建塔經唐尉遲恭重修然他無所據考之金英公塔銘及金史世宗詔有司增大舊塔之文及塔銘發見之地此塔當係金正隆六年建塔頂豎銅球六相傳某年墜落半球圓周丈餘寺內井水造飴糖經暑不黏名曰塔糖今之塔

糖偽造也

雙塔 城南雙塔嶺上有雙塔高十餘丈周一丈五尺相傳謂唐代建

古塔 城東南塔灣有古塔高十五丈建始年代未詳

舍利塔 在千山香巖寺老祖洞浴孟前乃元代高僧雪菴藏骨處也塔形如二石臼相合內注水四時不竭旁一孔可入手孔中有石球可圓轉惟不能出其碑銘一千一百六十餘字係翰林直學士陳景元撰文榮祿大夫李鈺光銘額金皇慶某年十月朔立其餘文字剝蝕殆盡不可辨識又有雪菴洞府四字匾額上鐫皇慶二年祖師涅槃下鐫隆慶元年發心重修

芳行塔 在千山大安寺西山厓之上明高僧劉德亮梁德安葬處有碑記載其晝夜打坐參問道源身不欹歇口不絕誦寒不近暖暑不依涼均係定遯衛人同於萬曆丙申歲圓寂是日祥雲密布香霧濛濛終日不散未載大明萬曆歲次丙申冬月吉旦賜進士原任知縣錫菴吏學撰僧人普元善人王應選同書

魁星樓 踞城東南角樓二層八角形建始年代無考有道光二十六年重修碑記同治

季年梁國璽又監修下層立碑上層雕魁星像立鰲頭上楹聯云能府煥文章願諸君

橐筆揚芬共奮蓬山雲路故鄉多俊傑看幾輩聯裾奪錦好增粉社奎光徐桐撰北斗挂

巖城仰層樓直上凌空好教步月梯雲手捫星宿南山當戶牖憑畫檻高瞻遠矚且喜

鍾靈毓秀地近邠岐倭仁撰奎壁煥天章東海人文應星宿川原培秀幹南山佳氣入樓

臺崇綺撰樓倚清虛接長白之靈秀筆橫紫氣育遼左之文明魯琪撰文昌八座阿閣三階樞

斗煥光華喜盛世星輝雲爛遼水瀦澗千山環抱川原鍾靈秀卜巍科鵲起蟬聯于凌撰

泊光緒庚子甲午間所有木像楹聯儘被外兵殘毀民國十三年重修豎碑樓下重刻

楹聯云何以對茲神乎若徒作金鰲頂上想豈是讀書種子今吾登斯樓也願廣搜鐵

鳳城中才仰憑論斗量之馬澤林舊作極美輪美奐以觀成執斗量才益見斯文未墜合司祿

司命而為主戴筐垂象乃知其道大光袁鎮南撰時勢慨風雲問意態云何俯檻眼開應

想像一塔凌霄千山拔地奎光煥星斗賴文章不朽登樓心賞莫忘懷瑤峯墨寶衍水

詩篇

袁金 鑄撰

星斗煥遼東卜就千秋文運英華留冀北養成一代儒風

馬宗 融撰

建造憶前賢

看亭隣望海橋對昇仙莫孤負當年結構經營逢哲匠願百尺先登一層更上重放開

吾邑文明

張逢 澤撰

天地蘊丹青毓秀鍾靈遼水回環綿道脈淵源接洙泗育才造士千山

聳峙炳文光

石玉 琪撰

天未喪斯文願篤生命世人才常使光芒射牛斗民猶存直道試重

整凌雲樓閣仰酬功德祀春秋

南蘇倪 正舉撰

聖人視斗觀天大啓文明遼海同欣瞻景運勝

槩凌霄貫日重新輪奐千山環抱毓英靈

李文 發

談笑有鴻儒應吐文章高北斗春秋多

佳日常留詩思在南山

錢紹彭書 帥文秀贈

金銀庫 踞城東北隅土山巔遼金遺址或謂明代之金銀庫今為觀音寺門北向清雍

正間建俗稱三山不顯此其一也有碑記有楹聯云蘭宇既清竹林亦靜諸天不老大

地長春

故遼陽知州 張鼎鏞撰

座下蓮花占斷西湖三月景瓶中楊柳分來南海一枝春

王芝 瑞撰

寺額

有慈雲法雨四字筆法懷素係陞福書民國七年寺僧修工於正殿前掘出方形樓頂

石柱一高二尺三面有文東曰唵嘛呢吧咪吽西曰正德二年吉日立南曰鎮宅平安

普安門龍王像 小東門額曰普安昔朝鮮入貢由此因呼爲高麗門樓上廟一楹中塑龍王像向東立右手執鞭指太子河相傳築城時風鑑家以此爲鎮可避河水冲刷近三十年廟圯像頽水竟西侵至城根

老爺廟坎 城北硝堡後舊有關帝廟地頗高因名爲坎在舊土城內天命六年清太祖得遼陽因都焉官民居北城關廟即此地也光緒庚子廟被俄兵毀現被南滿鐵路攔入附屬地內

京觀 明全遼志云在首山南七里魏司馬懿築唐毀之

張行願墓 金贈光祿大夫張行願及配高氏虞國夫人合葬之基在邑東韓家墳村今塚已平民國十二年春村人耕地掘得墓碣一方並盜棺二具一破一完計距葬時已七百七十六年矣

倪家台崔源墓 城南五十里倪家台村北古墓俗傳係倪閣老墳村以此得名然村中並無倪姓今其北山中尙有石人石馬石羊等民國八年於其附近發見墓碣一方乃

係明正統時昭勇將軍崔源之墓源原籍瀋陽實任僉都指揮現該村多崔姓蓋其裔也俗稱倪家墳誤矣

孫磐母曹氏墓 在城南四里莊墓已無存清季發見墓碣一方係弘治十三年葬志載城東四里莊之原爲新塋與現今方位不符

楊五山墓 明驃騎將軍楊五山字克從萬曆三十七年葬於城北蕭夾河村北塚已無存民國二年村人耕地得墓碣一方其地在該村學校北上坎平地處

李良臣墓 明明威將軍李良臣與配王恭人合葬之墓在城西南首山之南東甯衛村塚已坍塌今發見墓碣二方該村民多李姓蓋其裔也

韓總兵墓 在城東甜水站村南椅子山北有石人石馬石羊等惟碑已殘毀明成化間韓斌爲遼東副總兵此墓或即是歟

鄧大人墓 在城東南四十里響山子村北山麓碑碣無存詢之居民亦不知何代何名或係明指揮使鄧佐之墓尙待詳考

東京陵 在城東十里東京城之東北清太祖天命七年既都東京九年乃建陵寢於京

城之東北陽魯山

即慶壇山之轉音

命族弟鐸弼等往虎欄哈達之赫圖阿喇奉移景祖顯祖孝

慈皇后梓宮及伯父禮敦弟舒爾哈齊穆爾哈齊叔塔察篇古之子貝勒祜爾哈齊

即雅爾哈

爾哈齊

靈櫬將至太祖率貝勒諸臣出城迎二十里外皇華亭奉安山陵繼妃富察氏及

子裕英櫬亦同移於此順治八年封是山為積慶山禁樵採十五年遷陵於興京罷積

### 慶山祀典

舒爾哈齊墓 在積慶山西角係清太祖同母弟序行三初封達爾巴圖魯順治十一年

追封莊親王立有滿漢合璧碑文另載

穆爾哈齊墓 在積慶山東角係清太祖庶弟序行二以功封爾清巴圖魯追封多羅勇

壯貝勒有康熙十年所立墓碑文另載

雅爾哈齊墓 在莊親王墓右百餘武圍以牆追封多羅色貝勒係顯祖繼妃納喇氏所

出太祖之庶弟序行四

巴雅拉墓 在碩色貝勒墓之右追封多羅剛果篤義貝勒係顯祖繼妃納喇氏所出太祖之庶弟序行五有五世孫福寧所立墓碑文另載

褚英墓 在莊王墓左後方外圍以牆清太祖之長子封多羅廣略貝勒墓前無碑俗呼爲太子墳子杜度貝勒

達爾察墓 勇壯貝勒之子亦名大爾差墓在其父墓右側追封輔國公諡剛毅墓碑係滿漢合璧文另載

汪善墓 在積慶山東阜汪善係開國佐運武勳王楊古力之叔父姓舒穆祿氏清太祖命其駐東京陵次及卒遂葬於此以功勅封都督有墓碑文另載今東京陵徐氏其後裔也

覺爾察氏七十墓 在東京陵村南有墓碑文曰滿洲正黃旗覺爾察氏七十參領墓配傅氏祔葬碑文另載

薩哈廉墓 清太宗兄大貝勒代善之第三子以功封穎親王諡曰毅墓在城東太子河

南平頂山下現撥歸本溪縣境

杜度貝勒墓 清封多羅安平杜度貝勒墓在城東北百二十里響山

石漢墓 清贈光祿大夫一等伯加一拖沙喇哈番固山額真漢先爲明指揮徙居襄平以子庭柱有功得封爵墓在大東門外因太子河水患遷於瑩之西約二百餘武然今又瀕於水矣現在墓兩塚石碑三座石人石馬羊豕各二石獅四半埋土中豐碑高丈餘而鼯鼠已埋地大半墓前石門已沖沒矣碑文另載

巴士漢墓 在城東北十里太子河東迎水寺清拜太子太保刑部尙書授他布勒哈番有墓碑一座高丈餘半埋土中

馬文舉墓 在城南向陽寺村後碑文曰誥封宣議郎馬文舉之墓

馬重德墓 在其父文舉墓側碑文曰誥封資政大夫戶部右侍郎阿達哈哈番馬公諱重德夫人馬太母楊氏之墓詳見馬鳴珮墓志有鼯鼠碑座大碑一碑面尙未鐫字臥而未植據鄉人訛稱係馬郡王墳清初有墓丁看守春秋祭掃想是馬文毅殉難以後

子孫居京師遂不復歲時省墓故致此耳

吳萬福墓 在城西梨皮峪村西清康熙時贈左都督太子少保碑尙存

彭春墓 清授一等公都統太子太保墓在城東北八十里八家子

董秉忠墓 清初授奉天府府尹世襲都指揮墓在城北三里北小堡今墓碑無可尋村人亦無知之者

阿蘭珠墓 清初以武功授三等阿思哈哈番諡順毅墓在城北四十里廣善屯通志作光山屯墓碑尙存

古墓 城南十里大打白狐村東有古墓其塚巍然尙存有石人二石馬石豬等惟無碑可考或謂係明代顯宦初有八戶守墓故村名大八戶後人毀碑滅迹易其村名曰打白狐各戶投入他籍事或然也

孔有德墓 初爲明將天聰七年降清封都元帥進爵恭順王改定南王鎮桂林順治九年明桂王臣李定國破桂林有德死之歸葬於城南松樹花園村中墓外圍以甃牆植

松樹多株今已摧殘盡矣

耿仲明墓 仲明爲明總兵天聰七年降清以功封懷順王順治六年改靖南王鎮福建坐失查屬下罪自殺子繼茂襲爵葬仲明於城東南梅家花園村南康熙十年繼茂死子精忠襲爵十二年應吳三桂叛十五年復降二十二年滅族今碑碣無存邱壘頽圮矣

董遵誼墓 在城西北二里許北園村後墓碑高丈餘字多剝蝕祇餘數十字略云 董

氏之墓在焉 勅封朝議大夫遵誼公 太祖皇帝 在始祖以恪順世襲指揮使

賜進士及第奉 大夫 中書天寵 次天爵 日講起居注詹事府詹事 侍讀學

士副都御史董漢沈拜撰 按此墓已頽殘碑僅存土人亦不能詳姑存此以俟考

皇姑墳 在城東皇姑墳村村以墳得名有清雍正三年立汗白玉碑一座文曰端莊固

倫公主覺羅氏墓碑

劉烈女墓 在西關藥王廟路南女小字四姐嫂與牛七通姦欲并污之以滅口不從被

殺移屍於井事發嫂牛皆伏法事在康熙庚寅歲現在墓前有碑文另載

高麗大塚 城西北頭台子村西里許有大塚相沿稱爲高麗窖其實死亡戰士塚也其

坵周可一畝形如墩臺其下被河水冲刷露出骨骸長大異於今人有人在此拾得甲頁及護心鏡等物黑鏽模糊字跡莫能辨識今其坵盡沒河中僅餘沙堰矣

東明王墓 全遼志云在遼陽東三十里 按通考朱蒙爲東明王都紇升骨三國魏正

始中毋丘儉征高麗王宮將二萬人進軍沸流水上元高麗僧三國遺事朝鮮金澤榮

韓國小史各書載東明王爲高麗始祖朱蒙

轉音鄒牟見  
好大王碑

都沸流水山上日人林泰輔朝

鮮通史謂沸流水即佟佳江支流之富爾溝朱蒙卒於王莽天鳳五年厥後十世遷丸

都

今輯  
安縣

又遷平壤据此則東明王絕不能越七百里來葬於此且今城東三十里一帶

毫無故蹟可尋明志未可據也

## 名勝

遼東名勝首推千山歷來名人詞客遊踵所至不少留題所謂無峯不奇無石不峭無寺不古誠定評也全山面積截長補短約佔三百方里利之古者大都創自金元以後隱士縉流恆於斯焉棲止並無居民雜處其中有五大寺八菴九宮十二觀咸在重巒絕壁老檜蒼松雜花異卉之間際春夏風雨晴時秋冬霜雪降後靡不呈妍鬪趣使人應接不暇而山中各佳境尤以龍泉寺無量觀香巖大安爲最勝以五佛頂仙人台爲最高其餘綦布星拱翳如奧如殆難以覩縷數蓋天地鍾秀於斯經品題而益顯也故列名勝以千山爲首此外僅附及焉

無量觀 舊或稱爲無梁觀踞千山東北部創始於清康熙年劉道人大琳開山於此其所葬石塋尙巍然於觀外集仙台旁其先僅有羅漢洞玉皇閣相傳建於唐代至今獨存考之閣外石刻其形六面似元金時代物惜字迹模糊不能辨認據道士言亦係唐之遺石觀內除玉皇閣羅漢洞外有觀音殿老君殿三官廟大仙堂殿下院有玄貞觀

劉家菴白雲觀五聖觀四處玄劉二觀菴在山內餘在山外本觀內有道士一百餘人皆樸質茹素各有職事乃道教中之正派者也其觀有景二十四已經多人題詠雖命名未盡雅適要各得其彷彿茲就人所共見者略記於左不限於二十四數也

松柏侶 出觀北行數武爲羅漢洞東旁大石上有松柏各一株並生如伴侶然故名

掃箒松 在西閣角門外松高不及五尺枝幹橫生如掃箒然俗傳謂山靈特地鍾毓生此松以備掃山之用談之殊堪解頤

蛤蟆峯 由掃箒松再東數武有峯形似蛙臥張口南向如作不平鳴狀亦曰蝦蟆峯

可憐松 觀東有巨石如砥無土無礪上生一松根入石中遇風則搖搖欲倒有弱不禁風之意殊令人憐

無根石 過可憐松仰視峯頂浮攔一石高約丈餘岌岌欲墜上又堆小石三塊迎風似欲動搖然歷有多年其石如故

臥虎峯 無根石北偏有峯形如臥虎頭南身北口眼畢肖其勢頗雄天然奇特

月牙井 無根石西大石下有井水甘冽爲全觀汲水之所井口石天然成弧形因以爲名

豬嘴峯 由井而東轉回有一峯南向作細長形由東側面觀之宛如豬頭嘴伸如欲嚼然一名豬首峯

象鼻峯 由豬嘴峯而東稍南三十餘步道左峭壁高可數仞上圓而大下圓而細由石東面視之狀類象首長鼻下垂又作臥象峯

八步緊 再東行由遯頤庵曲折上升石磴盡處峭石削立略刻八磴僅能容足登時循磴匍匐緊上不容稍緩胆怯者多望之裹足過此經七步松由石縫側身穿過僅一窄徑左足登一杏樹右足即上天台石所謂一步登天者此也上有平方石丈餘可四人坐中有養魚池此境陡絕危險殊甚近經東北憲兵陳司令興亞捐資修道旁設鐵欄題化險爲夷四字勒之石足以引人入勝矣

三十三天 由極端返下有石塔三十三級階盡入天門地稍平俯瞰全觀盡在目前洵

第一勝景也

觀音閣 距天門數武鑿石成洞槩像莊嚴觀中諸廟以此爲最高

玉皇閣 在觀音閣左側峯頂南向地勢高爽上建傑閣工程堅固歷有千年毫未傾圮閣下西南有塔碑字跡漫滅不可辨識升至此惟覺清風冷然令人有淩虛之想蓋觀之高至此止矣故道人稱之曰觀頂

伴雲庵 由觀頂返回三官殿西北行數十步轉向東北上行經香柏樹下至伴雲菴門外刻石額曰遯頤菴菴在半山曲折深處較觀音閣稍低此菴係咸豐年間慈祥道人所建庵北兩峯高聳東西對峙東爲將軍峯因南面石壁上甲午戰後有將軍依克唐阿摩崖鐫攻鳳攻海功成一簣八字故曰將軍峯峯巔危峻無可攀躋按中日一役無功可言攻鳳攻海八字國人宜引爲大耻

振衣岡 即遯頤庵北兩峯之西峯有盤道甚險峻紆迴可以攀登頂極狹上有石台南臨深谷奚止千仞扶松下瞰則慄慄危懼若將隕焉南面峭壁上刻有振衣岡字年久

字跡漫漶用望遠鏡觀之係前明隆慶三年浙人白某所書岡北有最高峯寺僧稱之曰拜斗台云昔有道士中夜在其上拜斗其下有白碓各一近因石徑沖毀崎嶇偃仄罕有至其巔者以上爲觀後諸景

萬年松 在正殿前蒼顏古幹鱗老成龍相傳爲開山以前之物

羅漢洞 在聚仙台旁洞中神像極多笑怒坐仰狀態離奇令人神悚

獅子峯 在觀後稍東峯頂欵斜宛然似獅之蹲伏狀按獅爲百獸之王觀中有此一景足以威鎮山林矣

芙蓉峯 觀南對面孤峯奇秀隱現雲端由階上觀之有仙人掌上玉芙蓉之象亦奇觀也

聚仙台 山門路東劉公塔旁有黑石一方上平坦能容十餘人相傳昔有仙人聚集於此旁有八仙塔乃此觀之開山始祖劉大琳打坐處

玲瓏塔 塔在觀南山頭上高可十餘丈七級八角面面玲瓏相傳爲唐代所建亦千山

最古建築物也

松抱石 在觀之西偏有盤石礪礪虬松環抱現有一種天然固結情致又作石門松因石壁高聳中有門形其下石罅中有松特生故名

太極石 劉公塔之西南崗上路旁有大石一上刻太極石三字字倒懸上有道光二年六月二十四日翻身字樣相傳謂六十年一翻其實因雨水沖刷石根土剝年久自然翻倒耳

石龕松 嶺前有石庵一卑小僅容膝嶺頂孤松下覆針影披拂有致是以雅勝者也

正直松 太極石南崗上有孤松挺秀高可十餘丈直立不屈在千山中爲最高松

密松坡 聚仙台八仙塔東山坡松排山面蒼翠平鋪不見山石有風則綠波蕩漾若海面然洵奇景也

龍泉寺 在千山北部祖越寺之西約三里許相傳始建自唐元代高僧普菴洪光均在此得道萬曆九年奉勅重建山門惟碑文剝蝕多半難辨寺內有大雄寶殿天王殿韋

陀殿毘盧殿龍王廟藏有萬曆李太后所賜藏經度存藏經閣寺後山半坳有後閣爲  
五峯和尚所建附寺近有十六景經詞人題詠頗多詩詳藝文內本邑王爾烈瑤峯傳臚所題  
聯額至今尙存一聯云長白發祥疊嶂層巒朝拱遙看千笏列龍泉擅勝深庭幽壑巡  
遊曾引六飛來又云峰不必一千萬象已呈真宰妙景豈止十六四時當作會心遊又  
云龍之爲靈昭昭降雨出雲何必獨推東嶽泉之不舍混混烟波柳浪無難更作西湖  
又僧厨聯云泉水到僧厨香凝沈瀼松風來客榻清挹蓬壺又鐵嶺魏燹鈞西閣聯云  
雲氣嵐光幻作陰晴四時景松濤石瀨飛來風雨半天聲又繆太史潤紱聯云小立快  
吟詩喜經閣三楹晨光東上高歌狂縱酒看瓶峯一角秋色西來此寺境地深邃千山  
諸寺名勝未有及此者十六景列後

松門塔影

西閣後數武有僧塔塔前有松二株列如門晴日則塔影松陰掩映成趣

講台松風

在第一景北有石高二丈許上平坦從前老僧說法講經處石旁松遇風濤

聲謖謖

瓶峯晨翠

寺西南西閣前小峯陡起高三丈許下寬上尖石秀松奇自山門外遙望之如瓶孤松生其上斜翠欲滴如瓶插花舊作瓶峯插翠光緒甲午知州徐保全遼境在此刻四大字曰屏藩獨峙下註云甲午之冬倭夷犯遼大軍未集予號召民勇獨扼兇鋒幸叨天子威靈得保危城今和議已成江山如故遊覽至此見斯石挺然獨立障蔽千山因題四字以致感云光緒二十二年十月既望古越徐慶璋題

螺峯夜月

即丈石凌霄之易名龍泉寺山勢最高而奇者無如海螺峯西瞰龍泉東望祖越無量觀形勝如在掌握峯森森玉立與他峯不相屬頂平可四人坐梯松憑眺冷然欲仙月明之夕風景逾佳真勝境也

吐符應生

在寺後毘盧殿北石壁高聳上刻此四字明巡遼侍御盛泰字書解者莫衷一是僧修謫曰此非佛祖真言亦非神仙隱語法本說文象形會意左右開合上下斷續化二成四顯然易見分別言之聲音流露曰吐委曲飛揚曰符問答報告曰應水性活潑曰生符字象形餘皆會意開者合之斷者續之四復爲二前二字左右釋也後二

字上下釋也按此解愈費解矣應以天吐奇符應生聖賢之說爲是

龜石朝日 在寺後山徑旁有一石如龜首東向如朝日然儻樹碑其上天然巖窟不須石工彫琢也

蟠石龍松 在寺東小亭下有松若龍蟠於石上映合成趣

象山晴雪 由藏經閣東望有山如象長鼻下垂冬季雪後其形尤肖可謂無奇不有矣

獅口鐘聲 象山西有大石狀如臥獅首北身南旁有室內懸大鐘擊時聲觸石返響不啻若自獅口出者聲大而遠有振林壑懾百獸之概

石門彌勒 寺前高岡上有夾石徑如門過此一佛殿內塑彌勒佛像北向以鎮北天門者舊作彌勒倒坐

龍泉演梵 泉在寺內韋陀殿前上建龍王廟下即龍泉水白石罅出味甘美雖旱不涸寺之命名以此

石徑梨花 入寺道中有石徑極崎嶇旁生梨樹花開花落滿徑堆銀亦春日極佳之一

景惜梨樹枯後即盡伐去今存此空名耳

悟公塔院 即招提院悟徹講經說法處今墓塔尙存爲康熙二十年建

西閣客燈 西閣爲接待上賓之所入夜燈光遠燭林間綠陰紅影靜悄入微真別有興味也

鼓亭落日 西閣前有鼓亭當夕陽西下暮鼓聲中返照入亭晚景絕佳

萬松主照 寺之四圍羣山環抱寺即在萬松林中間其勢如以寺爲主松皆朝拱者然命名旣奇境亦實符 以上龍泉十六景其名稱係光緒丁亥經瀋陽繆潤紱東霖太

史品題更正

三星石 龍泉山門內有巨石三其形圓兩旁各一中間者與地平有石鐫法水長流四字

龍泉洞天 寺之二門兩旁天然石壁左壁鐫龍泉洞天四字明侍御胡所題又刻漱瓊二字下刻皇明隆慶三載賜進士第遼侍御蘇□盛泰字書寺僧修總爲頌曰龍脈泉

聲吐流如漱洞明天朗光照若瓊

洞天一品 在龍泉寺門外迤西有巨石一光緒二十年經長沙涂景濤題洞天一品四

字鑿石

大安寺 五大禪林之一寺在千山東南部由來最古有釋迦韋陀兩殿寺西通明金剛

二山間有隋碑寺內有唐代重修碑唐太宗征高麗曾此駐蹕在崇德元年曾撥給衣

糧僧十名後因失火災及藏經遂停衣糧命龍泉寺代管焉東山下有英烈觀相傳即

駐蹕地後山石級重重謂即白虎殿遺址山中石碾甚多謂當日屯兵碾米所用惜碑

志殘缺無文可徵耳千山山勢以秀聳著奇而大安一角獨稱雄曠南有通明金剛英

烈觀羅漢洞諸名勝俱雄傑聳峭遙望鳳岫諸山拱若列笏亦五寺中獨出之勝境也

舊有十六景品題不雅後經繆太史潤紱重爲品隲各予題詠 詩詳文藝 並題聯云帶礪控

三韓奇氣東蟠尙說英雄立馬 指唐王駐蹕 滄桑消一局層臺西瞰會邀仙客談棋 指仙人台 又聯

云奇直破天荒磅礴振衣得路幾人探險上快宜呼酒對洪濛排闥連山奔馬作潮來

十六景列後

保泰浮青 寺北有保泰峯爲寺之坐山羣峯環列勢若星拱此峯居中高聳巨石蒼松森森如華蓋嵐光上浮雲端白虎殿遺址即在其下寺中之第一景也

唐鑾擁翠 寺東英烈觀爲唐太宗駐蹕之所今已無存其下有孤峯特起名 桃山其南有屏峯松杉蒼翠如鑾儀拱衛翠華森列故名

雙峯排闥 寺東門外有兩峯高聳排列如儀仗寺僧謂之筆架迎門晴光添翠霜葉翻紅秋夏之交倍極佳妙

金剛鎮地 通志載有金剛山即此山也在寺西巍然特立狀圓滿而氣雄厚大有惟我獨尊之致洵千山重鎮也

通明夕照 通明山在金剛山北頂處有橫石罅自下視之約有丈餘當夕照時日光由此通過斜射寺內晶光奪目迥異尋常

碧桃獻壽 寺東筆架山南有一峯不甚高峯巔一石浮置如桃形遙望之如拱獻者然

噫亦奇矣

佛手拏空 寺南里許有佛手山由山西視之宛如佛手高撐大有引人入勝之勢

鐘樓遠眺 樓在寺東山脚下登樓西望則金剛通明佛手蒲棒諸峯皆歸眼底欲窮千里目不待更上一層樓矣

石洞藏雲 寺北山巔有羅漢洞如石室然長可六七丈不事雕琢而玲瓏透光有雲氣氤氳若出納焉洞內列十八羅漢石壁間有明嘉靖丁酉九月重陽碑記末署工科左給事中福清萃軒薛廷寵監察御史浙江思齋朱箴巡按監察御史古澶駝村史褒善工部郎中兩溪孫巨鯨等同游於此刻石記事惟創始何年則不可考僅記萬曆年間有岑堂同妻桃氏施銀裝像並修石門云

寶塔迎風 寺門外有迎風塔亭亭獨立遊人至此恍如先受其歡迎亦壯觀也

曇雲捧印 寺東南有山形如印盒俗呼爲印盒山閒雲繚繞環集其下作捧持狀清淨界中而有此官場形式造物者真巧於安排矣

香爐暮靄 通明山西北有香鑪峯形圓若仰盂斜陽返照時數縷烟生栩栩欲活

懸崖飲馬 通明山西斜石面上有古井一俗呼之曰扳倒井不知何時所鑿相傳爲唐

兵飲馬處未免附會

蒲町長春 通明山西有一峯頂上生蒲極茂密俗呼蒲棒山按蒲多生於水澤或下隰

山巔生此殊屬奇異

西閣凌雲 通明山下昔建有西閣高與雲齊居之者飄然有凌雲之概今已無存徒有

其名耳

石棚臥虎 印盒山東北有觀音洞俗呼石棚溝相傳昔時石棚下常有虎臥後有老僧

靜坐於其內將石棚隔而爲二至今西間尙有火炕舊蹟東間有巨蟒時出洞口亦不

傷人寺僧曾見之

香巖寺 五大禪林之一在千山南部寺當山陽山花極盛春夏之交滿山花開香氣氤

氳故名香巖昔人謂香巖在諸寺中名勝最多爲一山之冠蓋龍泉至狹大安近險祖

越亦少紆迴惟香巖外境既曠近復雙崖夾護鳥道千盤如往而復萬樹參差陰翳時有怪石出沒其間寺有唐代古塔元代高僧在此得道清季有高僧明意苦修梵行中日之役囑其徒曰此地將有礮火余將去矣未幾果圓寂卒年九十餘明季及清初曾撥給衣糧今寺僧五六人不似昔時之盛矣寺之名勝列左

老祖洞 寺後有洞相傳謂雪菴養靜處故名老祖洞洞前有石如孟曰鉢孟

雪菴塔 在寺前右偏爲雪菴藏舍利處塔係二巨石合成中空前有窟中如石白貯水永不竭內有石球以手探之可圓轉而不可出元皇慶中直學士陳景元撰有僧雪菴塔記清康熙壬戌張京江遊記謂碑覆土中掘土得之文之剝缺纔七八字今祇存十之一二耳

盤龍松 寺院內古松一株老幹拏空蒼皮皴若龍鱗盤屈結蓋蔭遮滿院蓋三四百年前物也文人名之曰盤龍題詠甚多

筆架山 寺前照山三峯中高而左右矮形如筆架若門前照壁焉

仙人睛 寺西有山上覆巨石遠望如目寺僧呼之曰仙人睛

錦繡坡 在筆架山下有坡五色陸離名之曰錦繡坡坡之上有南塔北塔相傳唐時建造然無可考

夾峯 寺南兩峯對峙又曰關門山門前以石疊塔曰一炷香兩峯之間架木爲梁闊僅逾尺引絙乃度峯頂有巨石古木有斷碑峯外道絕峯下有洞遊人須由洞口出入

仙人台 寺之東壁懸崖特高爲千山第一峯故寺僧有云山高仙人台路經五龍宮或大安寺皆可前往絕頂有峭石向北伸出高五六丈狀如鵝頭三面深澗好事者即其上石刻南極八仙像置奕枰焉蓋取八仙慶壽仙人奕棋之義峭石東下刻菩薩像高可二丈北面有清光緒間鐫篆文仙人台三字係涂景濤題台邊原有石欄今僅存石柱而橫欄傾圮原有木製登仙梯拾級可升民國七年龍泉寺僧常顯衣冠登台自墮台下死相傳其意在脫凡體也寺僧自此乃撤梯遊人僅能至台下而已台下係一平麓寬丈餘長十餘丈兩側陡削無際下視深澗令人眩暈乃天然勝境也

鸚哥石 寺東仙人台南有石高可六七丈狀如鸚哥首端有小塔若頂毛然故取名鸚哥石

煉魔石 在仙人台北相傳爲雪菴煉魔石雪菴碑有云打七煉魔常坐不臥此石較祖越寺煉魔石尤險由夾峯曲洞而上乃能至石所

中會寺 五大禪林之一地勢占五寺之中部因名中會考之碑志建自唐代亦古刹也寺前山勢重疊有如層樓名曰海獻蜃樓其西一峯作螺旋狀名曰海螺峯寺東有峯陡壁高聳其巔有小塔遠望如瓶名曰淨瓶峯殿前階下門內有井名曰西湖井寺後靠山巔如牛首名爲犀牛望月此類命名皆仍舊稱不計雅俗也

祖越寺 在無量觀西閣之前崖下亦五大禪林之一清乾隆六十年重修碑載唐時即有此寺寺後高峯如巨人垂腹跌坐據松鶴遊記爲彌勒峯石壁鐫有獨鎮羣嶽四字明隆慶二年刻蓋本道家玉匱經黃帝封蜀中青城山爲五岳丈人之義又刻有含澤宣氣四字本春秋題辭之說山之爲言宣也含澤布氣調五神也黃庭經五神謂五臟

取此以明彌勒垂復之義寺之南山有亭寺僧原名之曰接官亭乾隆間經邑紳王爾烈瑤峯改爲來鶴亭並有題詠北有羅漢洞由此北望有蓮花峯其形如菡萏無量觀在其上

五佛頂 五佛頂在千山之西北隅爲山中第二高峯下有普安觀觀僅有一道士觀中有玉皇洞關帝殿爲前清時建觀上有滴水重樓崖崖上即爲五佛頂由觀東上行石磴層層盤旋達於山腰勢已險峻怯者多不能登過此上升皆峭壁鑿有脚蹬僅容一身無返身餘地及至梯子松救命松處危險已到萬分蓋此處上有懸崖下臨深澗非登此松梯並手攀救命之枯松枝不能上過此徑稍寬行數武即達山巔所謂五佛頂也上有古石佛三尊新石佛二尊新佛係光緒二十五年邑紳馮蔭樹香岑遊此見古佛三尊於名不符乃補送二尊以足其數立有碑記現今僅存四尊據道士言其一爲熊推墮山下此山西望醫巫閭山北望遼陽白塔東南望鳳岫諸山一覽無阻其高峻可想見也 以上諸名勝以五寺爲最古其中龍泉以幽勝祖越以奇勝大安以雄曠

勝香巖以紆峭勝惟中會稍遜焉無量觀係清康熙時勅建可爲後起之勁其高峯以仙人台爲最五佛頂次之其餘若慈祥觀之六景曰獅子石象頭崖探松峯嵌松崖掃帚松如醴泉東極宮之三景曰石鐘石鼓三星洞朝陽宮之石人雙龍觀之松門雙井則等諸自鄒以下矣七菴之名曰龍泉南泉鑿嘉洪谷木魚石龍觀音九宮之名曰西海斗姥聖仙東極太和太安朝陽五龍聖清十三觀之名曰青雲普安無量玄真圓通慈祥雙泉鳳朝寶泉三清白雲雙塔武聖其中或創建或圯廢今昔之名間有不同茲不贅及

### 遼陽八景

華表仙莊 相傳謂丁令威修道處在城內南街舊旗倉故址即昔日石柱道觀每當天氣晴明瑞靄繚繞直冲霄漢時人咸稱爲華表仙莊今已無存

龍王夜渡 高麗門外太子河濱原有龍王廟正當渡口方月明之夕操舟夜渡者環顧峯巒羅列城郭森巖間以蟹火魚燈隱約與明星相映洵天然一幅圖畫也

神燈孤照 城內西街昔時夜有明燈或一或二隱現不常據父老傳聞僉謂有神射幻燈以照人行當有貴人出世自架設電燈後此燈永不復見

白塔晚晴 城西附郭里許有浮屠一座亭亭若柱高矗雲霄塔腰白堊生輝經久不變因名白塔每當雨後放晴斜陽一抹返照塔巔餘霞成綺頗饒佳趣又作塔影倒懸係指四大廟前溪而言溪距塔約有二里許中隔城墻塔影反射溪中如觀海市雖由折光使然顧妙景天成亦增清興

魁閣凌霄 在城東南隅城牆角上因城爲基復起石台三層周以石欄上建八角層樓由南面上升有石塔十六級民國初重修於石級兩旁護以鐵欄下層四門正中樹方石碑一座東北角設木梯聯步而升出口乃入上層口門置木蓋登臨者入則啓出則閉之上層中設魁星木像單足立鰲頂上名爲獨占鰲頭像可旋轉左手執印右手高撐握筆名爲點狀元樓窗用玻璃裝成外罩鐵絲細網周圍皆設几凳推窗四望清風爽氣盡入襟懷南面千山羅列如屏東來衍水環繞如帶孤塔峙乎西北首山映乎西

南俯瞰全城街市縱橫鱗次櫛比有飄然凌霄之概誠遼城眺望之佳境也

松柏琴聲 西門外西會寺百佛樓前舊有古松老幹孤聳繁枝茂密有時風入松間清韻悠揚隨風高下側耳遠聽宛若琴聲唐人詩云此曲祇應天上有人間能得幾回聞可以持贈也百佛樓久已湮廢自攔入鐵路附屬地後此樹被日人伐毀景已無存矣雙橋臥虹 西門外關帝廟前有石橋二相連如一俗呼爲八步兩座橋登關帝廟層階南望彎曲成半圓形財神廟位於兩橋中間如跨虹腰形勢奇特傍晚閒遊頗饒佳趣首山樵唱 城西南十五里首山因其爲西南第一峯故曰首山或謂山脈蜿蜒南行自此起首因以首名之或又謂山形圓聳突起如人之首因以首名之又或誤作手好事者鑿手印於石謂係薛仁貴遺跡則荒謬矣孤峯雄曠其巔有古台俗謂之斗清風寺在其陽白塔寺映其背日俄之役在此用大激戰亦遼邑之要塞也現在學校旅行多會於此相傳昔有仙人樵於山後夜聞歌聲而不見其人山之東麓觀音閣碑記亦載此事云

青雲觀噴雲虎 觀在千山之北麓山中著名道院也道士述山中勝景以爲神異每當酷暑大雨時行之際石罅中突呈多物狀如犬頃刻間山峯瀰漫不辨東西道人命之曰噴雲虎殊不知白衣蒼狗山川出雲古人嘗言之未爲奇也

附前明時遼陽八景

有詩見藝文

一望京傑構

城西南角樓名望京

二廣祐雄圖

即白塔寺名

三太水環帶

太子河環城東西北如帶然

四千山列屏

千山在城南如列屏

五香巖

佛夢

即千山香巖寺佛夢字義未詳

六華表仙因

丁令威軼事

七首峯泉瀑

今首山無泉

八陀洞懸珠

城東太河寺羅祖洞內有珠懸焉

遼陽縣志二編

人物

世皆以名顯當時光昭後世者謂之人物蓋就狹義言之也若就廣義而言則名臣碩學忠孝節烈而外皆可以人物概之茲編所列凡生存之鄉宦與科第及專門大學出身諸人雖未經論定亦附及焉



# 名宦志卷七

漢龔遂有云不遇盤根錯節無以別利器信哉是言蓋時勢清平守令無立功之地若世值變亂地處衝難則才猷易見焉遼邑居國境之東北自昔偏介荒裔固中國所力征經營者也秦漢以上猶荒服耳無政治之可言自祭次丹擊却鮮卑諸夷毋丘仲恭平定遼東李懋功等驅逐高麗拓國疆屏他族其人雖未官於遼而其功績在遼甚偉曾襄愨收復三城遼東始爲明有清初張尙賢首建大策設立州縣招徠流亡邠岐屏翰乃不空虛亦僉有功德在民洎同光時代盜賊迭起外患循生張鼎鏞徐慶璋一州牧耳獨能保境安民不驚七鬯儻皆所謂利器者非歟其餘或以戰功著或以治績顯所居民樂所去民思亦復不尠繼此而洩斯土者可以奮矣述名宦志第七

祭彤 字次丹東漢建武十七年任遼東太守時匈奴鮮卑及赤山烏桓連合數入塞彤數破走之二十一年秋鮮卑萬餘騎入寇彤率數千人披甲陷陣追出塞滿離高麗之屬絡繹歛附烏桓等並入貢自是悉罷緣邊兵在遼幾二十年衣無兼副及卒鮮卑等

每入朝過其墓必哭之乃去遼人立祠祀之

馬續 字季則博觀群籍善九章算術東漢永和元年遷度遼將軍典邊日久深曉兵要

以恩信招降萬三千口

毋丘儉 字仲恭聞喜人魏青龍初加度遼將軍率軍至襄平屯遼隊今海城境內人爭降附從

討公孫淵定遼東以功封安邑侯

有討高句驪紀功碑在今輯安縣板石嶺光緒季年發見購置省教育會石殘缺只有五十字又按儉與馬續慕容翰李勣等未官於遼陽然恢復遼東功績

在焉故  
並列入

慕容翰 晉昌黎棘城人字元邕虜之庶長子永嘉時遼東太守廆本以私憾殺東夷校

尉李臻遼東鮮卑素喜連木丸津等因欲為亂翰言於廆曰宜合義兵問連津之罪興

復遼東並吞二郡遂率騎兵破之立遼東郡而歸晉尋鎮遼東高句麗不敢為寇善撫

恤愛儒學自士大夫卒伍莫不樂從又慕容皝使子恪鎮遼東亦有威惠

李勣 字懋功離狐人唐貞觀十八年以勣與馬周為遼東道行軍大總管率十六總管

兵伐高麗十九年趨遼東自通定濟遼水拔蓋牟遼東白巖等城從戰駐蹕山

据魏志及  
遼史地理

志即今城  
西南首山

功最多尋復與牛進達伐高麗克南蘇木底石城乾封初擊高麗下十七城總

章元年進圍平壤裂其地州縣之

耶律羽之 遼天顯元年執海平立耶律貝為東丹王以羽之為中臺省右次相莅事勤

恪威信並行太宗初上言渤海去上京遼邈恐為後患梁水

即太子河据遼史地理志東梁河西流  
與渾河合又名太子河亦曰大梁水

之地乃其故鄉又有木鐵魚鹽之饒宜徙居之帝從之徙東丹國民於梁水時稱其善  
守

蕭孝穆 遼太平九年為都統討平大延琳於東京授東京留守治遼陽為政寬簡撫納

流徙民甚安之

耶律布庫

遼史作耶  
律蕭古

字惕隱太平五年遷東京統軍使涖政嚴明諸部懾服大延琳叛以

書結保州夏行美執其人送布庫布庫入據保州延琳氣沮東京以平

王棠 涿州新城人鄉貢禮部皆第一累遷東京戶部使遼太康二年遼東饑民多死棠

請賑卹全活甚衆

李晏 字致美澤州人金皇統六年准遼陽推官有政績歷遷御史中丞初遼主撥

戶民俾輸稅於錦州龍宮寺歲久以爲奴晏乃具奏在律僧不殺生况殺人乎遼以良民爲二稅此不可法今幸遇聖明乞盡釋爲良世宗納其言獲免者六百餘人

伊喇富森

金史移喇福僧

金崇慶元年充遼東宣撫副使歲大饑出沿海倉粟先賑而後奏之優

詔獎諭

王伯勝 元文安人爲遼陽行省平章政事歲大旱伯勝齋戒以禱即雨人謂之平章雨

延祐二年召爲大都留守遼民乞留不報泣涕而去卒諡忠敏

洪俊奇 至元二十六年乃顏叛從駕親征有功授遼陽等處行省右丞以疾辭叛王哈丹等竄入高麗遼陽騷動特起俊奇鎮遼左許便宜行事俊奇父福源先時唐遣才子八人往教高麗洪其一也居三韓唐城福源由麟州以招集北界之衆來歸處於遼陽瀋陽之間

洪君祥 福源第五子俊奇之弟也大德九年任遼陽行省右丞奏請新省治增巡兵設

儒學提舉官都鎮撫等員以興文化修武備歷遼陽行省平章政事子萬以戰功授龍

虎衛上將軍遼陽行省右丞

多爾濟

金史朵兒只

穆呼哩

原作木華黎

六世孫托克托

原作脫

子也事母至孝喜讀書不屑事章句於忠

君愛民之事深為究心文宗二年襲位之國遼陽順帝至元四年穆呼哩五世孫乃蠻

台以賂得為國王乃除多爾濟為遼陽行省左丞以安靖為治民用不擾至正七年拜

右丞九年復為遼陽國王

王結字儀伯元定興人性敏悟從董朴受經深於性命之學副憲王仁見之曰公輔

器也泰定中拜遼陽行省參知政事遼東大水請發粟數萬石賑之晚遂於易著易說

一卷諡文忠

多爾濟巴勒

原作朵兒只班

穆呼哩七世孫至正中出為遼陽行省平章至官問民疾苦知鄉民

負販入城貴室強買之僅給半值又其俗編柳為斗大小不一市儉得以高下其手即

飭厲防禁齊稱量諸物畢集而價自平嘗采前賢遺言為書以進賜名治源通訓藏之

宣文閣

唐仁祖

輝和爾人

原作畏兀人

至元中遼陽饑奉旨往賑同事者欲如戶籍口數大小給之仁

祖曰昔籍小口今已大矣吾知爲國卹民耳皆給以大口數

李之英

字允達嘗從曹元用受易從吳澄受尙書春秋從陳繹魯受詩禮河圖而就正於虞集泰定三年爲遼左學正士庶宗之有門生病其家皆遠去者之英就視療治尋

愈積習頓除

葉旺

馬雲

明洪武四年偕鎮遼東上以遼陽重地復設都指揮司統轄諸衛以旺及

雲並爲都指揮使至遼乃完城繕兵一方遂安八年納克楚侵遼旺雲及周鸚吳立等破之柞河連雲島以功進旺雲都督僉事其鎮遼東也翦荆棘立軍府撫輯軍民墾田萬餘頃遂爲永利旺六安人雲合肥人嘉靖初以二人有功於遼命立祠祀之

巫凱

明勾容人幼穎異七歲賦牡丹詩年十九代父百戶職永樂六年以從英國公張輔平交趾功遷遼東都指揮使振興文化修孔廟塑聖像頗多善政宣宗立以都督僉

事代朱榮鎮遼東請令塞外脫歸之少壯免送京師得自便又請罷松花江造舟之役英宗時上言邊情八事厚養死事者家益官吏折俸鈔給軍士冬衣布棉等事且召商實邊俱允行在遼三十餘年威惠並行邊務修飭前後守東陲者曹義外皆莫能及曹義儀真人永樂間召從征著奇績副巫凱守遼東廉介有守遼人安之在邊二十年無赫赫功然能謹守邊陲開拓封疆累功封豐潤伯世襲其麾下施聚亦守遼東封懷柔伯

王眞 盱眙人由千戶累功陞都指揮使管遼東都司事素著勞績卒賜祭葬

王祥 固始人掌遼東都司事恤下興學頗著善政

王翱 字九臯鹽山人永樂進士正統七年提督遼東軍務許便宜行事乃躬自行邊自山海關至開原繕城垣濬溝塹五里爲堡十里爲屯烽燧相接在任九年簡閱行伍振貧卹寡軍民便焉

孫檉 始姓葛復姓孫錦衣衛籍正德甲戌進士性剛介明敏爲監察御史按遼會開原

積憤殺虜酋等於衛衙共百餘級乃論劾撫鎮而原情以釋其衆內鎮守分守家人倚勢爲奸利皆按以法貪官豪右爲之斂迹嘉靖間奏修東北一帶邊墻公費有經民勞以悅人至今思之

羅綺 河南磁州人宣德進士擢監察御史按遼沈謀多智風紀振肅英宗北狩綺使虜往復辨難卒伸大義

強珍 滄洲人成化丙戌進士授監察御史按遼精敏果毅敢於搏擊太監汪直貴倖時監督遼軍妄殺建州人恃寵贖貨兵部尙書扶同冒襲功嘗珍論劾之直反誣珍下詔獄戍鐵嶺直敗復珍官

王嵩 河南汲縣人成化進士以監察御史按遼舉行朱文公冠婚喪祭禮痛革佛事遂至成俗云

李善 陝西隴州人成化進士以監察御史按遼時總兵羅雄武備廢弛太監章朗侵漁軍餉縱舍人奪人妻孥聞善至遂屏息論劾都督孫貴罷去有傳玄者嘗客李林家林

失所在其子訟玄殺林有司擬抵獄成矣善廉知林飲酒肆醉當鑪婦與所私利林財而殺林玄得不死其他平反多類此威震遼東奸豪斂迹官至工部尙書卒贈太子太保

劉大謨 儀封人由進士授御史按遼嚴明端正剔蠹除姦不爲鉤距而情僞自得鎮守太監岑章貪殘無厭大謨收其左右痛繩以法章惶恐謝罪大謨操之益急章乃賄通近倖誣以他事逮獄士民自遼陽抵山海關遮道哭留謫隆德典史後累遷至巡撫所  
在著績

劉成德 蒲州人正德辛未進士以監察御史巡按遼東修舉廢墜奏開儒學歲貢置雅樂射禮塑兩廡像親書聖賢牌位重修學宮政績甚著有詩名

張文明 山西陽曲人正德辛未進士授御史丙子按遼政尙大體寬恤小民自鎮撫以下皆疏其弊劾之時內官恃權放縱繩之以法皆股慄吏畏其威民懷其惠

李貢 字惟正蕪湖人成化進士巡按遼東先是貢曾分巡遼有惠政至是民歡迎之總

兵毛倫挾劉瑾勢橫暴不法貢裁抑之瑾喉言官誣以他事罰米五百石勒令致仕貢喜曰今日皇甫規得與黨人矣

高越 直隸鳳陽人弘治甲子舉人巡按遼東風采稜峻胥吏斂手舉鄉賢祠祀又興社學擇民間子弟每衛置教讀以教之有興學之績焉

鄭本公 山西朔州人正德甲戌進士巡按遼東時副總兵張銘恃其勳貴貪暴異常本公劾罷之時論稱快

王正宗 固安人丁丑進士巡按遼東先是遼陽有一鎮撫一經歷招權生事正宗蒞任先收之實於法地方宿蠹釐革無遺有妖人李真者以妖術謀不軌正宗捕得首惡得真私籍不視焚之反側旣安地方底定歷久人感誦之

常時平 交河人嘉靖乙丑進士由主事改御史按遼痛革宿弊凡稔惡奸宄之徒輒寘之法風裁凜然興學校甄庶官嚴厲中有綜理云

張鐸 南京留守衛人嘉靖辛丑進士由翰林庶吉士授監察御史按遼銳意經畧規度

要害於遼陽東建江沿臺險山孤山一堵牆散羊峪五堡開原建彭家堡李屯堡又積粟幾六萬斛貯遼陽預備倉鎔固封鍵以備兵荒後十年遼陽果遭大水瘟疫人至相食虜患頻仍賴此賑濟其思患預防之功大矣有閩陽稿梓于遼左書院

溫景葵 山西大同人嘉靖戊子舉人以監察御史按遼學識純正確有憲體遼自壬寅北虜侵犯之後邊民憂懼景葵令鄉村量力築臺有警就便保守其持法之嚴馭吏之肅人咸稱之爲真御史云詳見奏疏

周斯盛 陝西寧州人嘉靖癸丑進士授行人選四川道御史丁巳按遼是夏淫雨連月禾盡淹沒城垣傾圮虜乘機九月犯廣寧十二月犯遼陽斯盛督率官民拒守城陴軫恤殺傷區別功罪明年春饑亟開倉賑濟取庫贖金并貸得萬餘兩量給其積貯家俾予平糶貧不能糴者聚噉以粥又糴米關西預調金州島船至關自芝麻灣運至三岔河接濟上疏請賑乃命御史吉澄運米三萬石銀二萬兩賑恤當是時非盛盡心籌畫地方幾不靖矣

曾銑 江都人嘉靖己丑進士巡按遼東乙未春巡撫都御史呂經北巡至自開原如遼陽行政過激拂士卒心三月據城叛時銑按部至復州聞變亟旋四月入城開諭禍福以安之呂經歸叛卒門焉銑乃杖數人以徇啓門出是月廣寧撫順兵亦變銑各出檄陰圖渠魁陽示撫安上狀其事七月行射禮衆畢至忽出袖中姓名分令官卒授以意逾時縛八人至明日撫順擒七人殺廣寧賊首十二人不假兵革三城肅清遼人建祠祀之後以倡復河套爲嚴嵩所害諡襄愍

張鑿

字濟川嘉靖進士生平清苦始終如一任遼東苑馬卿比去遼人爲立生祠

王本固

字子民邢臺人嘉靖進士遼左饑奉命賑濟嚴嵩欲中傷之給米六萬石以騾

車運意謂緩不及事將罪之也本固奏一半折銀濟遼陽遠地一半本色濟廣寧近地凡再閱月而歲事遼左安焉

許進

河南靈寶人由進士累陞山東按察副使分巡遼東威名震懾中貴屏息撫按有

疑獄進數言而決後以事逮獄孝宗即位復起用至吏部尙書時劉瑾專政進以身係

天下安危善類賴之

許達 河南固始人正德戊辰進士由山東按察僉事分巡遼海東寧道禮賢愛民謙恭下士聽獄詳明人以不寃後宸濠之變達以不屈死諡忠節嘉靖間建忠節遺愛祠祀之遼城內

王舜漁 常熟人由進士歷官山東按察司僉事分巡遼海東寧道明敏公勤敢於任怨獄無留滯人無寃抑先是正德間國計告匱遼東軍職俸銀不得時給射利者行賂罔利舜漁發其奸遼人頌焉

馮顓 高平人嘉靖舉人任遼陽僉事清操卓行世所罕見歷任只攜一僕而已

楊行中 字惟慎通州人嘉靖時按遼東呂經激遼陽兵變兵部請勦行中疏請榜示諸城令其相捕贖罪上嘉納之事得寢

侯綸 山西太原進士嘉靖初任苑馬卿雅志清操屏權謝勢凡孳牧之事巨細究心蓄馬蕃庶足供武用子汝諒巡撫遼東

楊最 字殿之四川射洪進士歷苑馬卿嘉靖乙未遼陽兵變最厲言勅法以身衛呂巡撫得免復修建南衛城晉太僕卿以諫方士死

馮時雍 字子濟直隸開州進士由陝西苑馬卿復任遼東公正仁恕定孳牧之法以祛宿弊詳見奏疏創建永寧學增廣生員科貢又捐俸購明典制及五經子史諸書分給遼陽永寧監二學

翟敬 猗氏人弘治進士屢遷遼陽行太僕少卿廉清勤慎歸囊無餘資惟襤被而已

韓澄 高陽人弘治進士分巡遼東時妖人李真作亂澄捕誅之邊境以安

焦禮 顯州人英勇善戰從靖難陞都指揮使正統壬戌陞左都督充副總兵鎮遼東景泰甲戌大破敵眾于小團山斬獲甚多進爵東寧伯給券其文曰衝當一面勇敵萬人英宗聞其勇略召見賜蟒衣金帛在鎮二十餘年

周鶚 鳳陽懷遠人從征江淮魯豫等省以功陞都指揮僉事調定遼右衛馬雲葉旺素聞其勇凡有征伐必委任之洪武丙辰納克楚犯金州鶚率精兵逆戰蓋州大敗其眾

復深入其巢斬首百餘級得其所掠而還復往東寧邀擊達兵斬獲千九百餘級生擒渠帥數十馬牛千二百餘復與徐玉招討東寧安撫司等處所獲甚眾又總率諸軍征哨鴨綠江與東寧黃城等地方所獲人口牛馬無算繼往東寧那丹府嘉州前後招獲安撫使高闕出副使劉並頭目人民四千五百五十馬牛二百七十及金銀牌銅印誥文戊辰領軍鐵嶺創立衛站自黃城招至江界萬戶金完奇等二千七百餘口太宗北征特賞馬匹以勞其勤年六十七卒遣使賜祭

陳玉 襄陽均州人洪武三年自慶陽歸附除定遼都衛正千戶乙卯從葉旺破敵蓋州功最多又克達軍高鐵頭山寨尋哨東寧攻蒲河略地閭山松山戊辰以功陞定遼左衛指揮僉事從大軍征乃兒卜花進兵赤赤兒獲平章阿帖木等官九百二十四戶五千一百七十一口馬牛駝輜重以萬計遠至王寨河遇野人來攻玉設伏兵殺其酋帥十二人遂遁庚午進征上都直抵益都山追捕乃兒卜花以功賜內廐馬

徐玉 德州人丙午年歸附洪武二年陞定遼左衛指揮僉事壬子守禦遼陽率官軍邏

臭柳河遇也先不花軍玉鼓譟而進生擒其酋長麻的而還又從葉旺征老鴉山寨攻走高嘉勞追至渾河大獲人口馬牛丙辰納克楚犯金蓋二州玉率部邀擊於三角山達眾敗走追至鴨綠江擒達官忽林卜花及軍校百餘後略地迤北招獲渠酋並部落牛馬輜重甚多丁卯征納克楚玉爲前鋒抵金山俘斬尤眾又略地海西至松江招諭人口五千餘馬牛車輛九百有奇至一通河虜踵其後玉自以精甲爲殿終莫敢逼總兵嘉其勇令帥游騎邏戍遇寇力戰中流矢死

徐便 湖廣黃岡人元季兵敗民失依歸推便爲帥保障鄉里辛巳率眾歸明授千戶以功由蓋州遼海等衛陞遼東都指揮僉事恭儉禮士推誠待物遇事倉卒未嘗疾言遽色居官蒞政所至有聲卒于官

劉斌 崇明人以靖難功陞指揮僉事後以金州勦倭寇陞指揮使轉遼東都指揮僉事時值歲儉外抗夷虜內撫軍士政理民安著有能聲

魯全 湖廣澧州人以功陞都指揮同知調遼東正統己巳監軍王翱以攻撫順地當要

衝檄往守之北虜遂不敢犯景泰庚午建州李滿住萬餘家攻撫順穴城欲登全令男婦運薪城上賊近輒藝薪投之又令壯士剗斜窟以銳擊之賊退以全城功陞都指揮使

文安 江都人洪武間累功陞千戶征進有功又陞都指揮同知永樂間以才能調遼東都司在任招安夷虜撫恤軍餘以壽終

方盛 安慶懷寧人定遼中衛指揮僉事有能聲權守瀋陽屬時清平惟以課農爲務按行阡陌督責勤惰在任二十餘年野無剽盜庭無爭訟

白暉 字仲瞻幼讀書魁梧有謀略由東寧衛百戶調兵朝鮮却餽曠禮國人重之從參將劉端出塞征兀良哈招諭撫夷有功陞指揮僉事

緜謙 山後人由指揮僉事累立奇功陞都督僉事成化己亥挂印充總兵鎮守遼東謙德重厚謀勇過人庚子與韓斌東征有功陞都督同知仍鎮遼在鎮數年夷人畏服有惠政焉

王鏞 字廷堅祥之子定遼後衛指揮使以戰功陞都指揮僉事從撫寧侯朱勇征建州累陞都督同知在任展築墻塹七十餘里增置烽墩四十九座改創演武場修理學校後改守寧遠卒賜祭葬

高雲 自在州指揮正德間山東流賊倡亂雲上書自効以功陞右參將分守南路躬率士馬屯種樵採民甚賴焉又於義州逐虜面中二矢勇氣益倍遂陷虜陣然以尙氣性罷官人多惜之

馬永 直隸遷安人嘉靖丁酉鎮守遼東先是虜爲邊患永至遣譯招撫不率乃厲兵饗士檄各將領率精兵爲深入計秋八月自高平進兵幾二百里虜覺宵遁明年三月諸酋相率請罪己亥廣寧叛卒餘黨嘯聚永預伏甲士於樓旁舍衷甲往諭賊挺刃向前伏甲士出斬之地方肅然庚子疾革但云看人馬而終

高大恩 東寧衛指揮歷備禦都司陞廣寧遊擊謝病嘉靖己未兵亂聞大恩誣搆在獄排獄推爲主大恩曰能從我則出不從我即死此眾諾乃戒不殺人不放火不奪市不

閉城巡按至我爲若等白之上馬至鐘樓令收酒帘不許沽酒軍氣稍息乃自入獄後三日巡按至撫定之

李涑 保定人嘉靖庚戌充副總兵分守遼陽性正大莫敢干以私食無兼味衣無重帛訓練士卒常寓撫綏之意軍官犯科斂者重笞黜之在任三年邊夷不擾及陞山西鎮守送者爲之罷市

劉國 宣府人嘉靖辛酉充瀋陽遊擊膂力絕人射貫重甲壬戌代遼陽副總兵事時虜擁眾入寇至甜水站搶掠人畜數萬國聞報領兵馳赴追至四顆松虜分三大營而出各營一健曾迎敵國發三矢連中三賊首虜遂大潰盡奪所掠而還遼人獲再生之慶焉

韓武 憲宗時協鎮遼東展陽明臺水間嶺諸屯堡復請於清河地方設立城堡置備官兵建鴉鶻關以限內外嘉靖間爲之建祠額曰褒功在遼陽南三里莊

麻貴 大同右衛人萬曆二十五年任備倭總兵數有功進右都督予世蔭三十八年鎮

遼東明年沿邊有蒙古三萬騎入掠穆家堡貴禦之敗去是夏引病乞休詔乘傳歸貴果毅驍捷善用兵一時稱爲良將

劉江 宋應昌 萬世德 永樂中江鎮遼東巡視諸島相地形勢請於金州以望海塢

築堡防海卒敗日本兵使不敢犯邊萬曆壬辰日本關白舉三十六島之衆突入朝鮮詔應昌經畧薊遼防海備倭明年敗之平壤咸寧時倭侵朝鮮世德以邊才進職巡撫經理朝鮮命董一元等統精兵敗日本於釜山捷聞特命總督薊遼在任惟以息事安民寬大簡靜爲務以疾卒於官

李秉 字執中曹州人正統進士景泰初提督遼東軍務成化二年復整飭遼東大同邊備至即劾鎮守中官及總兵失律罪出裴顯於獄入舉指揮崔勝傅海等節用愛民恩威並濟識拔將才邊境以安

周俊 字朝用鶚之孫定遼前衛指揮僉事調開原充右參將成化丁亥東征出鴉關以騎兵抵賊巢俘斬四百餘級復征建州陞指揮使朶顏邀殺海西貢使俊勒兵追及土

石門斬首十一級奪回方物開拓柴河抵蒲河六十餘里增立烽堠疏挑河道又改設鎮北清陽二堡邊人稱便尤精太乙術占驗風角數驗分守二十餘年自陳去任

莊鑑 字克明定遼右衛指揮使善騎射有膽力成化丁亥征建州摧鋒破敵雖矢石交下而面益赤氣益壯所部乘之遂破賊左都御史李秉以奉集堡直抵通遠一路當賊衝要俾鑑提調殺賊東鄙頓安及副總兵韓斌開拓遼東邊境鑑督兵防護邊旣開賊犯西徼追襲境外斬捕首虜盡奪所掠而還叙功累陞都指揮同知己亥從信國公朱勇征建州爲前鋒直擣其巢斬獲之功眾莫能及奉諭軍前陞都督僉事賞銀牌官至僉左軍都督府事卒于家

文寧 字邦靜定遼前衛指揮使其先揚州江都人以父廣陣亡陞二級襲授都指揮同知成化丁亥東征建州陞指揮使調守海蓋己亥復征建州以功陞都督僉事寧志氣精悍法令嚴明曾在陣見一虜半山獨立呼騎取來二騎飛取至營其威令如此尋卒上遣諭祭於家官爲營葬焉

韓輔 字良弼斌之子幼穎敏讀史傳兵法從醫閩賀先生遊弘治己酉襲改定遼中衛備禦撫順海蓋庚申擢右參將分守錦義據險設伏虜三入皆大破之九月大舉入唐帽山援至遇敵張左右翼餌引入伏四面伏發斬獲無算捷聞賜綵幣癸亥修築清河等十一堡建屯堡百十座耕守應援相依陞署都督僉事鎮守遼東拓高平驛以便宜旅修鎮寧鎮夷二堡築邊垣起廣寧至開原長互千里功聞賜金帛武宗登極賜蟒衣辟寧舊與夷通市以釁侵擾廢市至是滿蠻雄諸部輔遣譯招滿蠻宣諭犒賞結以恩信朵顏諸酋聞風相率入市不復擾邊奏聞賜璽書褒獎後僉中府致仕卒賜祭葬輔爲將識大體善因事立功每軍行戒曰賊敗乘虛亟擊勿貪虜首分我兵力且多則費爵賞啓爭端於我不利知兵者以爲名言

韓璽 輔之子字國信弘治乙丑武試進士襲加授署都指揮僉事遊擊將軍正德戊辰義州軍亂總鎮欲以兵平之璽單騎入撫人爲璽危璽獨無難色卒能已亂陞遼陽副總兵虜犯海州追斬其眾陞署都督僉事充遼東總兵賜蟒衣二表裏白金二十兩在

鎮簡賢能逐庸弱申令僚屬簡閱兵馬威惠並用南山僧孟法泰以妖惑人實之法朶顏寇寧遠璽率兵追斬獲所掠蒙賞賚有加累却虜於清河開原廣寧皆捷陞都督同知履任十年屢蒙賞賜疾革聞家人求取南杉木止之曰吾東人以松爲棺從俗可也又聞以玉帶殉葬乃誦昨日玉魚蒙葬地異時金盃出人間之句曰此無用者遂卒著有軍門諭眾錄八陣圖法子承恩武舉任建昌營參將承慶歷陞都督同知由延綏大同轉遼陽副總兵以武功顯

蕭濬 字克已東寧衛指揮僉事正德六年調征流賊以滕縣平度狼山功陞指揮使九年征江西桃源洞以功陞都指揮使累陞都督鎮守山西提督三關卒於任濬體貌魁梧武宗呼爲門神然遠於勢利卒以免禍齊給事之鸞奏稱當兜鍪交橫之時獨守靖恭之節可見其人焉

楊照 字明遠都督鎮之孫曾充前屯指揮及密雲副總兵鎮守遼東累戰小沙河退達虜防瑞昌擒哱囉迭蒙欽賞後去任尋擢遼陽副總兵於團甸子江沿臺長安堡三捷

並奏詔復前職旋命鎮守遼東癸亥八月由鎮夷堡出境剿賊遇伏起照陣亡贈少保左都督諡忠壯蔭一子賜祭葬立祠照沈毅有謀知人得其死力胸前後刺盡忠報國各四字每出輒以後事付家人故所向無敵虜以楊太師呼之兵部尙書楊博疏稱照一月之間功成三捷一生之概威振羣胡並輓詩勒石以分示九邊

郭振 東海衛人弘治間由義州參將舊遼陽副總兵時東邊被夷擄去嫵卒一名振出境召其酋責之夷素畏振乃歷諸寨求得原卒送還又巡西邊有夷登牆窺覘召至重責扶去有盜犯書盜犯之家四字於其門軍民得遺物不敢私匿其爲人所畏服如此

王崇之 直隸滑縣天順進士先知上海縣累陞御史時遼陽數有邊警戰備久弛士卒饑寒崇之按遼調劑振作切中機宜以不屈汪直謫延安府推官

王懋中 江西安福人舉進士遷刑部郎中擢山東布政司參政分守遼海東寧道懋中沈毅強學練事勤政聽斷明允懷輯軍民東人安焉後官至南京都察院右都御史致仕宸濠之變新建伯王守仁以他事至澧城聞亂奔還吉安遲回探望時伍文定守吉

安懋中率士夫義勇狀上守仁起兵討賊言甚激烈守仁從之倡義之功懋中爲最尋卒於家入祀廣寧名宦祠

趙孔昭 字子潛邠臺人嘉靖甲辰進士授監察御史出按遼東時遼將李錡不法倚仇鸞之勢恣橫人莫敢言孔昭毅然劾之一時頗著直聲焉

翟律裳 聞溪人嘉靖進士任兵部主事條陳邊計多所舉行陞遼海東寧道有撫順守備以白金貂皮行賄即揭正其罪墨吏震悚

李成梁 鐵嶺人字汝器由生員襲指揮僉事隆慶丁卯陞副總兵協守遼陽萬曆甲戌晉左都督鎮遼總兵次年封寧遠伯予襲陰前後鎮遼二十八年莅任最久著在國史加太傅累疏乞休卒年九十三賜祭葬

李化龍 字于田長垣人萬曆進士鎮遼有功陞兵部尙書請撤稅監高淮遼人德之卒諡襄毅專祠致祭

劉英 崇明人性孝友管遼東都司事歷任既久廉能益著年老乞休遼人攀轅留之

王樸 沁州人歲貢孝友持躬著書立節官遼東都司教授士人化之

熊廷弼 字飛百江夏人萬曆二十五年鄉薦第一明年成進士累陞御史三十六年巡按遼東巡撫趙楫總兵李成梁棄寬奠新疆徙民內地已論功賞廷弼劾之又以遼多曠土請行屯田於邊邊將好挑邊釁力陳守禦策有十五利奏行之在遼數年杜餽遺核軍實按劾將吏不事姑息風紀大振後因與御史荊養喬相奏訐投劾去嗣楊鎬喪師復起代鎬經畧未出京開原失上言請速備芻糧器械等毋掣肘得允賜尙方劍甫出關鐵藩全失遼陽洶洶疾馳至則斬逃將祭死士造戰車置火器濬濠繕城令嚴法行數月守備大固姚宗文劉國縉因事怨廷弼及御史顧慥馮三元先後劾之廷議乃以袁應泰代經畧

張尙賢 清順治十一年知遼陽府上根本形勢疏言地方新設民多招徠等情在任拊循有道一二年間遂致殷富去任後民爲建祠於州西甕城內歲時祭之

范時崇 忠貞公承模之子瀋陽人康熙二十三年任知州寬簡愛民凡徵收錢糧並無

火耗時議撥民屯田民多遷徙時崇以本境地屯種有餘請不他徙以故遼民得安生業陞福建按察浙閩總督有惠政閩人思之從祀道山忠貞公祠

劉貞 順天大城人康熙二十六年任知州在遼十七年招徠教養善政宜民百姓思其德數世不衰

胡祚遠 漢軍正黃旗人康熙四十三年任知州在遼一年頗有惠政人思慕之

陳學海 浙江桐鄉人康熙五十一年任知州在遼三年德政及民增修文廟兩廡以興文教百姓奉牌祀之於城內城隍廟與劉貞胡祚遠同

王 瀚 江南宜興人康熙五十八年任知州時境內救平諸務待舉瀚性勤敏喜獎掖士類履任後即增修學宮義館以提倡文化士民趨之

何夢瑤 字報之號西池廣東南海人雍正八年進士分發到奉尋任本州知州才具精敏剖決如流惜在任未久旋調廣西歷官岑溪治獄明慎宿弊革除有神君之稱富於著述旁通百家而尤以詩名有菊芳園詩鈔莊子故皇極經世易知錄賡和錄醫編紺

山醫案算法廸三角輯要移橙餘話當時大吏將以鴻博薦辭不赴其生平論詩謂青蓮獨擅千古子美未應齊名可謂風雅吏矣

陳瀛 嘉慶二十二年特授知州在遼十餘年清慎廉勤頗有惠政

郎若曾 道光十九年署州事次年特授知州才具敏練而性慈仁在任八年遇有疑案悉心訪查務盡其情使無冤抑士民奉之若神明卒後奉牌祀之於城內城隍廟至今稱道弗衰

鮑師釗 咸豐十一年署知州事剖斷明決吏不得欺

張鼎鏞 字子升維揚眞州人道光丙午舉人同治元年特授遼陽知州到任即整頓書院捐資獎勵諸生文風爲之一振時四方多盜乃捐廉募勇覓線偵賊編查保甲民賴以安五年春徐占一馬僂子等賊由海城縣界率衆數百北來犯境鼎鏞露宿城上與民同甘苦城中素乏軍火商民聚石城上以投賊賊却退乘而擊之乃遁去平日聽訟明決賑災卹疾實惠在人後卒於省寓遼民赴省弔奠建祠於州城內三教堂東祀之

額曰張公祠

張雲蕃 鼎鏞兄子也自同治七年署州事光緒四年特授知州前後凡四任民愛慕之如父母

張錫蕃 字康侯光緒十一年特授遼陽知州精於吏事聽斷明允一時翕然稱之十三年復任遼陽未幾卒於任

徐慶璋 字瓊齋浙江山陰人光緒十九年八月署州事值甲午中日之役州城戒嚴請練鎮東十三營督率士卒日夜罔懈賞罰嚴明人樂爲用比日本兵入海城吉林靖邊營却退至州城外將復北去慶璋出城以大義忠誠力阻止之客軍入城采買無敢騷擾且由鳳凰城入遼陽以吉洞峪迄北一帶爲要害因督飭吉洞峪練總徐珍操辦鄉團與鳳凰西界聯結地方賴以自保是時城西連年水災民多乏食乃募集巨款遣員沿屯調查按戶賑濟無敢侵蝕者以故實惠及民全活無算其平日爲政寬猛兼施士民畏之如秋霜愛之如冬日有徐青天之稱中日議和後陞慶陽府知府繼遷甘涼道

未到任而卒

黃毓琛 字止敬河南光州進士特授知州光緒二十二年到任聽斷詳審吏不能欺考試童生親自閱卷評定甲乙弊絕風清襄平書院每月課試循循焉爲諸生講解士林奉之爲師焉

馬俊顯 字績卿光緒二十七年署州事值庚子亂後前知州楊昌瀚設立善後局延紳朱集成胡魁福張德倫趙祖昌等董其事俊顯到任與諸紳和衷商辦地方賴以保安對外仍不失主權惟是盜匪餘燄未息除南路吉洞峪一帶東北路半拉山子等處鄉團外其東西北各路團局多係招撫降隊丁多餉少勢難供給乃勦撫兼施擒獲盜匪立即正法旋奉令裁撤撫團改編保甲地方行政以次就理

鮮俊英 字華甫直隸密雲人光緒甲辰正月接篆與俄人交涉退出州署並償修理費若干重修州署頓改舊觀冬十月卸任洎丙午歲奉令到遼推廣鄉鎮巡警就保甲改組從前招撫馬步各保丁限制額數分別裁遣畫爲東西南北中五路以士紳主其事

尋復署州事前後兩任案無留牘民有頌聲紳民咸樂附焉

史紀常 字曜五江蘇武進人宣統元年春到任遼陽學務經前州何厚琦創辦接篆後即極力擴充學校增多一倍二年五月改組衙署裁房班革積弊設會計行政執法三科紀綱整肅政治聿新宣統三年亂黨假革命名目潛伏南滿車站附屬地勾結數百人突入劉二堡又一股踞高麗門外龍王廟約期破城史州誓死固守密電奉天將軍趙派兵星夜赴遼一舉撲滅劉二堡亂黨聞風逃竄市井賴以安全未幾調省全城士紳恭送依依不忍去云

田薌穀 字紫駿吉林伊通州漢軍正紅旗附貢生民國五年五月由海城調署遼陽奉省單行新章民間買賣田產減價匿稅經人檢舉加數倍處罰檢舉人得提成費奸人乘機漁利或因乞假不遂及睚眦小忿輒行檢舉以爲此端一開罰不勝罰故遇有此案或輕罰或令補稅轉摘檢舉者之過而深斥之置產者皆感其德爭來補稅而檢舉之案以清行政訴訟傳集兩造諭令和解壹以息事寧人爲主旨在任四年士民感戴

有口皆碑卒於任送喪者盈街塞巷由縣署至太子河絡繹不絕

...

...

...

...

...

...

...

...

...

...

...

...

...

勳舊志卷八

自公孫氏威行海外屹爲藩服遼東之地始以人顯迄遼金元清皆崛起北方以此爲京國重地一時人士如風雲之與龍虎以類相從乘時建樹功在太常爵列五等代有其人是乃邦家之光非第一邑之榮也爰述勳舊志第八

公孫度 字升濟漢遼東襄平人初爲玄菟吏後舉有道累遷遼東太守東伐高驪西擊烏桓南越海取東萊威行海外自號平州牧子康嗣封襄平侯

李胤 字宣伯晉襄平人父信早喪胤有識之後即以喪禮自居祖敏爲漢河內太守去官還里公孫度欲用之乘舟浮海莫知所終胤設木主事之舉孝廉歷河南尹封廣陸伯進爵爲侯遷御史中丞恭恪直繩百官憚之泰始初拜尙書轉太子少傅拜侍中加特進俄遷尙書令歷職內外而家至貧兒病無以市藥上聞之賜錢十萬拜司徒太康三年卒諡曰成孫志嗣爵

李元護 北魏襄平人晉司徒胤八世孫少有武力軀幹魁偉以魏平齊後隨父懷慶南

奔爲裴叔業司馬裴歸魏元護與之魏景明初爲齊州刺史封廣饒伯州內饑表賑貸  
蠲賦役

高崇 北魏遼東人字積善父潛自高麗歸魏賜爵開陽男崇少聰敏以端謹稱景明中  
除洛陽令爲政清斷發摘不避彊禦縣內肅然嘗謂人曰仲尼四科德行爲首人能立  
身約已不忘典訓斯亦足矣諡曰成

高謙之 字道讓崇之子少事後母以孝聞及長專意經史天文算歷之書多所賅涉襲  
父爵孝昌初行河陰令有囊瓦礫詐市人馬者逸去謙之僞枷囚於市宣言是詐馬賊  
今欲刑之遣腹心密察市中有二人相見訢然曰無復憂矣遂執之舊制畿縣令得面  
陳得失時佞幸惡其有所發聞遂奏罷之謙之上疏諫爲寵要所疾除國子監博士以  
父舅氏沮渠蒙遜曾據涼土國書漏缺乃備涼書十卷李神軌讒之賜死朝士冤之著  
文章百餘篇行於世永安中賜諡曰康

李弼 字景和北周襄平人少有大志膂力過人屬魏室喪亂嘗曰大丈夫會須平寇亂

安社稷以取功名安能藉階資求榮位乎魏永安元年從爾朱天光及賀拔岳屢討賊賊咸畏之曰莫當李將軍賀拔岳被害弼勒兵歸宇文泰以功拜特進加柱國封趙國公每從征討朝受命夕便引路略不問私事性沈雄有深識故能以功名終諡曰武配享廟庭弟欒字靈傑長不盈五尺果決有膽氣爲周文帝都督從平弘農破沙苑跨馬運矛衝堅陷陣敵人退避文帝歎曰但使膽決如此何必八尺軀也武成初從豆盧寧征稽胡有功封汝南郡公弼之子綸有文武才

李衍 隋人字拔豆父弼爲太師衍少專武藝慷慨有志略仕隋討平叛蠻進柱國後以伐陳功拜安州總管頗有惠政

李寬 邢國公輝之子弼之孫幹略過人自周及隋數經將領位柱國蒲山郡公號爲名將子密有縱橫才唐興密降

李澄 唐遼東襄平人蒲山公寬之裔德宗時爲滑州刺史李希烈陷汴滑州亦降興元初澄自永平遣盧融奉表詣行在德宗嘉之署帛紹納蠟丸授澄刑部尙書汴滑節度

使澄密勒士馬以計誅希烈養子之成白馬者及希烈悉眾圍陳州澄遂引兵歸國後封隴西王卒贈司空

耶律貝

字托雲

原作突欲

遼太子幼聰敏好學外寬內摯遼太祖問事天敬神孰先曰孔子

大聖萬世所尊遼主悅即建孔子廟立以爲太子天顯時從征渤海大誣譔降尋叛又破之改其國 東丹城曰天福以貝爲人皇王主之遼主薨貝知太后欲立德光謂公卿曰大元帥功德及人神請以位讓之德光即位疑貝乃城東平號南京徒貝居之盡遷其民貝歸國命王繼遠撰南京碑起書樓於西宮作樂田園詩唐明宗遣人密召之再至貝謂人曰我以天下讓反見疑不如適他國以成吳泰伯之名乃立木海上刻詩云小山壓大山大山全無力羞見故鄉人從此投外國遂浮海去唐迎之至汴賜姓名曰東丹慕華拜懷化軍節度使瑞慎等州觀察使復賜姓曰李贊華後明宗養子從珂篡遼主加兵於洛從珂召貝與俱焚不從見殺遼迎歸葬醫巫閭山諡讓國皇帝復增諡文獻欽義皇帝貝通陰陽知音律精醫善畫工遼漢文年僅三十八歲耳按明志云

都司城內東丹國新建南京碑在宮門之南是東丹王宮當在今縣城內

托布嘉 家世仕遼歸金收國二年守東京遼軍二十萬來戰或曰戰危事獨苦請何也

曰丈夫不得一決勝負尙何爲苟臨敵不捷雖死猶生也遂出戰有功累封漢國王卒

贈太師晉國王

托布嘉即撻不野  
一曰大泉譯改

高楨 金遼陽渤海人少好學業進士幹魯破高永昌以楨同知東京留守事海陵時歷

遷御史大夫拜司空封冀國公楨久在臺彈劾無所避每進對必以區別流品進善退

惡爲言及卒書空獨語曰某事未決某事未奏死有餘恨年六十九楨性方嚴家居無

聲伎之奉雖盛暑未嘗解衣緩帶對妻孥危坐終日不一談笑其簡默如此

張浩 金渤海遼陽人字浩然本姓高東明王之後曾祖霸仕遼爲張氏天輔中遼陽平

以策干太祖即命承應御前文字天會八年賜進士及第歷遷禮部尙書行六部事簿

書叢委決遣無留人服其才改平陽尹郡中大治累拜太師尙書令封南陽郡王致仕

初近侍有欲廢科舉者上問浩曰自古帝王有不用文學者乎對曰秦始皇上顧左右

曰豈可使我爲秦始皇乎事遂寢卒諡文康浩從兄元徽之女係金世宗元妃

張汝霖 金南陽郡王浩三子字仲澤浩嘗稱之曰吾家千里駒也貞元中賜進士大定九年授諭德兼禮部郎中尋進少師兼尙書拜參知政事世宗謂羣臣曰唐太宗明天子也晚年亦有過舉朕雖不能比迹聖明每思始終如一汝霖曰古人云靡不有初鮮克有終魏徵言守成難正謂此也二十八年拜平章封芮國公受顧命進封莘切諫章宗多獵詔嘉許之明昌元年卒諡文襄 按中州集仲澤兄弟汝爲汝翼汝方汝猷並汝霖五人而其先人張行願配高氏墓志後注孫汝能書並云孫四人汝霖汝能皆志於學蓋墓志在先故記載不同耳

李石 字子堅遼末狀元父綽爾齊石世襲謀克敦厚寡言器識過人少貧仕金姊貞懿皇后周之不受曰國家方急用人正宜自勉何患貧有慢之者初不校及爲相其人以事見石曰吾豈念舊惡者朝廷欲發民穿塹防北邊石等以爲勞民無益乃止以功累遷御史大夫圖克坦子溫平章政事喀齊喀之姪也賊濫不法石劾奏之聞者悚然大

定九年領尙書事拜太保封廣平郡王致仕卒諡襄簡石以勳戚久處腹心之寄內廷獻替多有足稱明昌五年配享世宗廟庭

李獻可 金廣平郡王石之子字仲和由進士歷州縣入翰苑累遷戶部員外郎以事貶

清水令起爲大興尹遷侍郎終於山東路提刑衛紹王即位以元舅贈道國公

蕭仲恭 托不嘉之孫仲宣之兄金天會間爲使於宋後封越國公留守燕京諡貞簡

孟奎 字元秀金大定進士調黎陽主簿累遷同知中都路轉運使值旱詔審冤獄多所平反除博州防禦使凡屬縣事應赴州者令不得泊於逆旅以防奸吏刁難民甚便之官至北京臨潢府等路按察使諡莊肅

高宣 元遼陽人太宗元年詔宣爲元帥從睿宗攻大名宣進曰奉命出師伐罪弔民願勿嗜殺人以稱上意睿宗召元帥穆納諭之如宣言下令軍中及破城兵不血刃民心悅服四年從破金兵三峯山降宣者二千餘戶籍以獻以宣爲鷹坊都總管賜金符仍令子孫世其職卒封營國公諡簡僖

高天錫 宣子事世祖潛邸甚見親辛中統二年授父官爲鷹坊都總管尋改燕京諸路總管按察副使語丞相博囉左丞張文謙曰農桑者衣食之本不務本則衣食不足教化不興古之王政莫先乎此願留意焉丞相以聞上悅命立司農司以天錫爲中都山北道巡行勸農使尋遷司農少卿進兵部尙書卒封營國公子諒官兵部尙書襲封諡簡懿

吳成 明遼陽人從成祖起兵有功遷都指揮僉事永樂初授都指揮使三從出塞以功進左都督宣德初以成嘗宿衛東宮封清平伯三年從北征敗賊於寬河進封侯卒贈渠國公諡壯勇

張大猷 清遼陽人字遜字隸漢軍鑲黃旗天命六年兵克遼陽自廣寧來歸授佐領逾年予三等輕車都尉世職崇德四年以副都統征錦州以礮克城旁一臺而敵乘間遁坐疏防論褫得寬宥逾年授鑲黃副都統五年隨睿親王多爾袞圍錦州率本旗兵攻五里台及涼馬山馬家湖等處克金塔口臺六年隨鄭親王濟爾哈朗圍錦州會松山

敵突出奪紅衣礮大猷擊却之同都統劉之源攻克塔山杏山及附近諸臺以功晉二等七年擢兵部參政隨貝勒阿巴泰征明至渾河築橋以濟明總督范志完拒戰與祖澤洪擊敗之八年隨鄭親王取前屯衛中後所晉一等輕車都尉順治元年同葉臣等逐山西流賊擒李自成將郭某克太原復同李國翰招撫郡邑攻黃河柵獲船十五二年從大軍定江南浙江明兵自錢塘夜襲擊却之取嘉興歷取揚州崑山常熟江陰諸郡縣皆督礮克城有功三年同巴山鎮守江寧總管漢軍及綠旗兵旋授提督江南總兵晉爵三等男四年侯元瀚通明魯王於海島大猷得其書據奏得旨嘉許六安州賊福寰結黨踞英山霍山有年大猷與巴山率兵會馬國柱進剿斬福寰賊寨悉平功居第一晉爵三等子世襲罔替九年卒於官子應庚襲長庚事另詳鄉宦

張玉龍 字雲亭大猷五世孫由馬甲歷補雲麾使襲世管佐領又襲三等男乾隆四十二年授雲南景蒙營游擊洊升參將補雲貴督標副將六十年從福康安剿苗於松桃廳嗅腦諸處及近楚一帶又隨攻吳半生於蘇馬寨西梁雷公灘攻吳隴登於茶它山

等處俱護勝嘉慶元年擢貴州安籠鎮總兵歷平南籠府狝苗克望城坡水煙坪八角洞各寨有功疊蒙恩賞調雲南臨元鎮總兵七年維西獠匪焚劫康普古刹等處夷人恆乍紉假號活佛勾結獠匪玉龍時署提督馳往賊毀橋樹柵恃險負固玉龍乘夜造橋以火攻之遂克阿喃多寨進破康普恆乍紉逃江外總督琅玕奏留康普彈壓八年恆乍紉就擒內外肅清以功議叙十七年授鑾儀衛使逾年卒子安德襲爵安明整儀尉事詳國史

石廷柱 先世居蘇完姓瓜爾佳氏父石翰始家遼東遂以石爲氏有子三長國柱次天柱廷柱廷柱明敏有智畧善用兵天命七年歸清太祖喜曰我國人仍歸我國錫金印鞍馬授輕車都尉隸漢軍正白旗從討蒙古巴林部晉三等男天聰三年搜毛文龍所屬諸島五年招降明總兵祖大壽於大凌河隨貝勒岳託入旅順口上酌酒勞之晉三等子九年同阿山趨錦州斬明副將一擒游擊守備三人覆其軍五百崇德元年隨征朝鮮明年李琮降以功升左翼都統尋復征錦州降其將王昌功等四十餘人是歲分

漢軍兩翼爲四旗任爲鑲白旗都統六年上言錦州爲遼左首鎮宜簡精銳分布各旗屯田遇警並進轉戰至松山杏山敵必敗遁錦州可破矣則關外八城聞風震動此即當年瀋陽失而遼陽隨下沙嶺失而廣寧隨順之明效也若少挫其鋒勢必速退宜伏兵高橋以銳兵尾其後洪承疇一書生耳所統皆烏合如祖大壽一失諸將必遁後皆如其言晉爵二等子順治元年隨軍入山海關歷平昌平土寇及山東山西河南師還晉一等子十二年授將軍駐防京口戢兵安民人稱石佛加少保兼太保晉一等伯十八年卒年六十三諡忠勇詔立碑紀功聖祖親定功臣百十五人忠勇與焉

石華善 忠勇伯第三子豫親王多鐸以女妻之授和碩額駙尋任內大臣康熙十三年吳三桂反詔華善督所部兵習水戰尋命簡親王喇布統兵江寧華善與王之鼎參贊軍務十五年授平寇將軍統轄江南滿蒙兵嗣授定南將軍十八年擊敗僞將軍吳國貴范齊於永州有功二十七年上疏請允仍隸滿洲卒賜祭葬子文炳襲伯爵

宜永貴 隸漢軍正白旗任佐領兼參領崇德五年從圍錦州克涼馬山等處六年戰松

山克高橋南三台七年克塔山各台順治元年任兵部理事從征河南江南克揚州破敵戰艦歷升都統倉場侍郎十三年由南贛巡撫調福建會海盜鄭成功率率眾猝薄城時官兵赴漳泉城守單弱永貴力疾率士庶登陴每堞守一壯丁十堞領一庠生每門以稽紳數人督之晝夜拊勞與城守合力固守起廢弃田勝等領騎兵易服更番分出七門接戰每多獲殺凡三薄城三却之嘗坐射烏樓寇悉眾來攻礮仆侍役神色不動指自揮若守而月發礮殲其渠魁圍乃解康熙四年叙功至三等男卒

柯汝極 遼陽人後隸廂紅旗漢軍天命六年攻克遼陽有降人叛逃汝極舉發其事復擒獲間諜十四人授叅領天聰八年授禮部叅政考滿晉職二等輕車都尉崇德七年分漢軍隸八旗以汝極任佐領順治元年復授禮部叅政尋改廂紅旗漢軍副都統晉一等輕車都尉四年以副都統率兵駐防杭州七年七月卒無子以弟之子永秦嗣襲柯永秦 汝極嗣子由襲職任兵部郎中兼叅領遇恩晉三等男擢副都統兼戶部侍郎順治十三年擢都統同大將軍伊勒德征浙江海賊永秦躍入賊艦斬其總兵胡自慶

諸軍並進斬其伯阮恩總制陳六御遂定舟山康熙元年以征山東賊功擢京口將軍後被劾罷職弟永藝襲職

按柯汝極一統志通志皆作何今從名臣傳作柯

柯永盛 漢軍副都統柯汝極從子也崇德六年任佐領隨大軍圍錦州攻克涼馬山台及杏山塔山七年同馬光輝鑄神威砲八年隨鄭親王征明取前屯中後所叙予騎都尉世職順治元年任刑部理事官旋授膠州總兵勦平昌樂土賊輕騎入青州計擒李自成裨將趙應元復率兵圍高密擒斬偽元帥張輿二年平濰縣土賊張廣三年調江寧總兵總督洪承疇遣令會勦江西叛賊南贛巡撫苗胙土請留永盛鎮守詔調南贛總兵四年湖廣興國土賊殺武昌同知寇掠江西武寧永盛遣將分勦柯抱冲陳珩玉並就擒斬明桂王朱由榔據湖南江西石城諸邑應之皆次第勦平之擢湖廣提督金聲桓叛興國孝感諸賊亦蠢動永盛移兵守要隘並分勦以時奏捷十年張獻忠餘黨李定國等掠湖南大軍由衡州進征永盛兵繼其後擒斬無算晉三等輕車都尉調山西提督考滿加左都督康熙七年乞休加太子少保十四年卒子鍵襲

佟鳳彩 字高岡漢軍正藍旗人順治元年授香河知縣尋內陞山西道御史疏言近畿治河下部議行由巡按湖南歷遷河南督糧道廣西右布政江西左布政十七年擢四川巡撫時都江大堰以兵燹壅塞乃疏請開濬民田咸被其利康熙六年授貴州巡撫以駙站險遠奏增設腰站以紓人民苦累又請清理田賦以杜私派十一年爲河南巡撫疏請修築河工盡出官僱不費民力又請罷協濟輓豆之役十三年因病乞休得旨解任調理總兵周邦寧以士民籲留入告左都御史姚文然疏言鳳彩卹民疾苦民愛而信之宜令力疾視事遂命仍留任十七年卒於官年五十有六賜祭葬諡勤儉祀湖南四川貴州名宦祠著有栖友堂集

英廉 馮姓字計六號夢堂隸漢軍鑲黃旗雍正十年舉人授筆政升主事乾隆初命往江南習河工補同知遷知府十五年擢永定河道被參褫職十七年因在稻田廠効力復由筆政累陞十年間至戶部左侍郎核定順天府屬旗地租額上以所奏甚爲得理命兼錢法堂事復管崇文門稅務及武英殿事務又以送兵征緬甸事辦理妥協歷由

經筵講官步軍統領遷刑部尙書議政大臣四十二年協辦大學士調戶部尙書尋授漢大學士又暫署直隸總督清制大學士滿漢各二人及于文襄歿時方爲戶部尙書滿缺上以其祖籍遼陽漢軍協辦有年老成練達奉職恪勤命踐文襄之席蓋不拘常格也初通籍時雅嗜芸緗與厲樊榭查蓮坡詩酒酬和著有夢堂詩稿卒諡文肅入祀賢良祠賜祭葬

甯完我 清遼陽人字公甫天命初歸清隸漢軍正紅旗太宗召直文館尋授參將天聰四年兵破永平命鎮守之從征大凌河察哈爾並招撫有功授騎都尉世職上疏請立六部設言官言頗切直復與范文程馬國柱疏陳伐明之策頃奉諭各舉賢能完我請自後所舉之人或收功或獲罪令舉者同之如隨時檢舉得免連坐庶幾人知畏法而得真才並嘉納之順治二年授弘文院大學士歷允明史總裁會試主考實錄總裁並繙譯三國志洪武寶訓諸書賞賚優厚八年改授議政大臣疏劾大學士陳名夏復加太子太保兼太傅以老乞休聖祖念其効力多年命以一子補用學士卒諡文毅入祀

賢良祠

官文 王氏字秀峯內務府漢軍正白旗人由侍衛累官荊州將軍大軍圍賊武昌官文控上游與之首尾相應又以南岸兵單命舒保率馬隊渡江大破魯家港六壘連戰破大壘十三咸豐八年督湖廣時李續賓沒三河皖軍潰敗乃疏請起復胡林翼規復安徽而籌策應厥後饋餉不絕與有力焉十一年由協辦授文淵閣大學士同治元年改授文華殿大學士以平定粵匪功封一等果威伯改隸滿洲六年署直隸總督卒諡文恭著有敦教堂詩鈔

靳輔 字紫垣隸漢軍鑲黃旗居遼陽順治九年由官學生考授編修累遷內閣學士康熙十年巡撫安徽撫循招徠民皆復業上言政在足民莫如力行溝田之法及滇閩變作吳耿二叛寇江西乃練標兵募鄉勇武備大振宋鑣踞歙郡山中爲寇遣兵躡剿以計擒之于巢湖上游以安部議省驛遞費以佐餉乃上議謂省費莫如省事惟軍事專奏餘悉彙奏遂著爲令歲省錢百餘萬加兵部尙書十六年授督河時黃水四潰不復

歸海清口運道盡塞乃上下千里相度治河事宜列疏入奏大旨以因勢利道爲主廷議以餉絀難之復疏言不爲一勞永逸之計屢築屢圯何所底止上以河道關係重大令再奏堅持前議特如所請乃濬清江浦至雲梯關外河身築隄萬八千丈塞諸口河隄外加縷隄及格隄于徐州宿遷築減水壩十三座清水潭舊隄潰號最險工乃用棄淺就深計築東西隄更挑新河八百四十丈又浚甘羅城運河十里請裁冗員專責成改河夫爲兵領以武弁畫地分疆日稽月考凡所爲懲因循謀經久皆此類也方功之未竟也詔伊桑阿閱工令布政崔維雅隨往崔奏上河防芻議兩河治略二書并條列二十四事欲更減水壩諸法部議欲令賠修上不允仍發帑堵築二十一年蕭家渡工成河歸故道御書閱河詩賜之并佳哈御舟上用帷幙異數也明年疏請添建減水閘六以保徐州添建石壩石閘及陽武等縣河隄縈澤埽工以防上流溢漲均從之會上命于成龍經理海口及下河事宜仍歸輔節制輔言築長隄束水入海涸出田畝還民餘田招墾成龍力主開濬海口故道又臺臣等先後疏劾乃停築重隄奪職嗣因漕運

便利上諭廷臣曰前于成龍謂開中河無益反爲民累今開音布云河漕兩利謂治河無功微獨輔不服朕亦不愜于心命仍爲河道總督乃復疏陳兩河善後策及河工守成事宜幾及萬言薨于位年六十特命入都治喪漢大臣所未有也賜祭葬諡文襄入祀賢良祠著有治河書奏疏若干卷略以賈讓三策爲不然專主築隄束水績用告成實千古河防龜鑑也論者謂功不在宋禮開會通陳瑄鑿清江浦下云長子治豫雍正三年協理江南河務次子治荊字熊封歷官安徽歙縣知縣甘肅固原知州寧波同知江西吉安知府

丁應元 遼陽前衛人隸漢軍正黃旗年十四舉孝廉清太宗選學讀書世祖簡直書房繙譯章奏皆稱旨聖祖年五歲上命之伴讀以至御極累官至郎中平居不輕言笑人品端方學問淵博聖祖嘗嘉許之尤精六壬方疾革時謂夫人曰吾觀三子中能承主恩者其阜保乎數十年後吾言方驗其二子果早世康熙丙午終於家賜祭葬銀並葬地備異數追賜御書素心松桂四大字建坊懸之

阜保 姓丁氏號鶴亭應元之子由主事歷任員外郎康熙十三年爲內府郎中兼佐領擢參領內府總管三次隨征加級光祿大夫甲子冬扈駕幸闕里立御書聖廟碑監修周公孟子二廟己卯南巡同尙書席爾達等督理舟楫夫役御賜書一幅聖祖嘗謂之曰汝父伴朕讀書汝年亦五歲汝父最孝且勤謹堪委託因此主眷特隆年老乞休食一品俸乾隆十一年九十六歲朝廷爲之建坊又一年卒諡文恪子二長松次桂以御賜書得名也

高斌 字東軒世居遼陽漢軍正黃旗人雍正間改隸滿洲由內府主事遷郎中管理蘇州織造廣東布政河東總河兩淮鹽政兼江寧織造十一年諭令就近學習河工署江南河道總督奏請治河事宜兩次回鹽政任尋授總河乾隆元年疏言河工照兵四夫六之例又言葦蕩應歸廠運以杜弊竇請將歲解河工銀悉歸道庫條奏疏濬黃河工竣得旨嘉獎議叙四年九月進京取道與孫嘉淦會勘直隸河道歷陳治河事宜並設水誌以時啓閉皆允行十二年授文淵閣大學士五月直隸水利工程告竣下部議叙

十六年上南巡命仍以大學士兼總河得有急公好義得大臣體獎諭二十年卒於工次賞給內大臣職銜謚文定著有固哉草堂集兄述明有積翠軒集子恒孫樸杞女慧賢皇貴妃恒樸父子皆未克終杞官按察使

黃廷桂 福建巡撫秉中之子也康熙四十九年由監生襲雲騎尉世職尋遷三等侍衛補參領雍正三年授直隸宣化鎮總兵五年擢四川提督以勦撫確里密等處枝夷及疏陳苗疆地方情形均蒙旨嘉獎九年授四川總督乾隆二年補鑾儀使尋署天津鎮總兵五年遷古北口提督未幾授甘肅巡撫十二年署陝甘總督逾歲授兩江總督疏請各營按日如式操練並飭造七力及十力硬弓尋奏立限清查積案十五年加太子少保十六年調督陝甘十八年調督四川尋晉吏部尚書留川督任二十年晉武英殿大學士兼管總督事二十二年以廷桂籌防厄魯特與吐魯番回人莽阿里克潛謀叛逆調度合宜賞雙眼孔雀翎並加賞騎都尉世職令其子承襲二十三年又以廷桂籌辦庫車等處糧運合宜加少保銜尋由騎都尉晉封三等伯賜所封伯爵號忠勤二十

四年廷桂以督辦軍需抵涼州病劇而卒柩至京上親臨奠醊予諡文襄入祀賢良祠  
圖形紫光閣御製贊詞輓詞懷舊詩列廷桂於五督臣首皆異數也孫嘉襲伯爵

蔣攸銛 字穎芳隸漢軍旗籍父韶年官知州母徐氏禱於蘇郡五隲山而生幼穎異年  
十八舉於鄉出翁覃溪門劉文清見其試律擊節稱賞曰當爲太平宰相十九成進士  
選庶吉士尋由編修充福建副考官歷典貴州陝西河南鄉試分校會試督學廣西補  
御史授贛南道廣昌匪亂受命往激厲士民擒誅首惡餘黨散嘉慶十年署惠潮嘉道  
逾年擢按察遷雲南布政旋進江蘇巡撫調浙江十五年入覲預重華宴逾歲督兩廣  
時英国有護貨兵船擅入內洋飭停其貿易始遵約復督蜀川兵驕縱裁之以法習乃  
革二十四年帶領川中土司大頭目十四人入都祝壽召見十一次錫賚有加道光初  
爲刑部尙書錫紫禁城騎馬復督直拜協辦學士五年時六十歲御賜宣勤篤祜額並  
各品晉文淵閣大學士加太傅授兩江總督十年坐鹽梟事左遷侍郎入都卒上深惜  
之世稱襄平相國性聰強書牘過目不忘與人一面數十年猶記憶爲政飭武備清吏

源尤樂培植人材駁歷中外所有聲著有繩樞齋詩集子蔚遠官貴州巡撫

源尤樂字蔚遠，貴州人。嘉慶二十一年，中庚子科，授中書。二十五年，授中書。二十六年，授中書。二十七年，授中書。二十八年，授中書。二十九年，授中書。三十年，授中書。三十一年，授中書。三十二年，授中書。三十三年，授中書。三十四年，授中書。三十五年，授中書。三十六年，授中書。三十七年，授中書。三十八年，授中書。三十九年，授中書。四十年，授中書。四十一年，授中書。四十二年，授中書。四十三年，授中書。四十四年，授中書。四十五年，授中書。四十六年，授中書。四十七年，授中書。四十八年，授中書。四十九年，授中書。五十年，授中書。五十一年，授中書。五十二年，授中書。五十三年，授中書。五十四年，授中書。五十五年，授中書。五十六年，授中書。五十七年，授中書。五十八年，授中書。五十九年，授中書。六十年，授中書。六十一年，授中書。六十二年，授中書。六十三年，授中書。六十四年，授中書。六十五年，授中書。六十六年，授中書。六十七年，授中書。六十八年，授中書。六十九年，授中書。七十年，授中書。七十一年，授中書。七十二年，授中書。七十三年，授中書。七十四年，授中書。七十五年，授中書。七十六年，授中書。七十七年，授中書。七十八年，授中書。七十九年，授中書。八十年，授中書。八十一年，授中書。八十二年，授中書。八十三年，授中書。八十四年，授中書。八十五年，授中書。八十六年，授中書。八十七年，授中書。八十八年，授中書。八十九年，授中書。九十年，授中書。九十一年，授中書。九十二年，授中書。九十三年，授中書。九十四年，授中書。九十五年，授中書。九十六年，授中書。九十七年，授中書。九十八年，授中書。九十九年，授中書。

鄉宦志卷九

班固有言元菟樂浪之俗民不相盜及取吏於遼東而俗稍益薄以今觀之殊不盡然就遼邑一隅而言東南多山鍾毓特厚又負冀北剛義之氣習與性相因生其間者類皆尚質而少文金元以上人尤渾樸泊於有清地接陪京涵濡乎岐豐之教澤士習紘誦文化漸開以故鄉賢政績或散見於史乘或者獻所傳聞錚錚佼佼正復不尠也爰摭其實依序列至生存之仕宦論定雖俟將來亦載其姓氏官階俾後得考焉述鄉宦志第九

高恭之 北魏高宣之子字道穆學涉經史所交皆當世名流幼孤事兄如父母正光中爲御史糾擿不避權豪魏孝莊時元灝逼虎牢道穆勸帝循河東下號召諸軍一向虎牢一赴河內爲犄角勢由是得反政除中尉外執直繩內參機密凡益國便民之事必以奏聞選用御史皆名輩泰昌中贈雍州刺史

張元素 金人字子貞與南陽郡王浩同曾祖以蔭得官天眷初知涿州察廉最累遷興

平軍節度使正隆末天下盜起元素發民夫增築城郭同僚諫止之不聽未幾寇掠鄰郡皆無備而興平獨安遷戶部尚書出鎮武定致仕元素厚重剛毅人畏懼之

高德基 金遼陽渤海人字元履皇統二年進士爲尚書省令史海陵爲相專悞自用人莫敢拂其意德基每與之詳辨大定九年遷刑部尚書有罪當死者宰相欲從未減德基曰法無二門失出猶失入也不從上召諸尚書諭曰自朕即位以來以政事與宰相爭是非者德基一人而已改戶部尚書上書乞免軍需房稅等錢減農稅及鹽酒等課未報後降蘭州刺史

大懷貞 字子正金皇統五年除閣門祇候累遷彰國安府軍節度使爲興中尹錦州富民殺人匿府少尹家有司不能捕懷貞取之寘於法縣尉獲盜得一旗上圖亢宿詰之有謀叛狀株連萬人懷貞請誅首亂者十八人餘皆釋之

高衍 金遼陽渤海人字穆仲少有能賦聲同舍生欲試其才使一日賦十題未暮賦皆就彬焉可觀登進士乞歸養二年調補瀋陰丞金世宗時爲吏部尚書向每季選人至

吏部託以檢閱舊籍謂之檢卷有滯留至後季猶不得去者衍三爲吏部知其弊歲餘銓政修理選人稱便

烏塘 金大定間爲長子令剖決如流人皆悅服尤善撫流亡均徭役革包納侵漁之弊去任後人爲之立去思碑

高竑 遼陽渤海人以蔭補官調貴德縣尉提刑司舉任煩劇遷奉聖州錄事進內黃令尋陞安州刺史知河南府充安撫使同知大名府以功遷三官貞祐二年遷河西北路按察轉運使致仕

蕭仲宣 遼托布嘉之孫本名野里補後歸金世宗嘉之以其能知遼國故事命權宣徽使皇統中授鎮國上將軍歷順義永定昭義節度使爲政平易小吏不敢爲姦賄賂禁絕潞州百姓立祠刻石頌之

高德裔 金鶴野人字曼卿弱冠登第擢登聞院同知歷太府少監平陽少尹開州刺史豐王傅終於西京轉運使

另見文學

張汝芳 金南陽郡王浩第五子字仲賢章宗時知沂州治民寬而御史嚴深得政體歷  
久人猶稱之官至宣徽使退居後自號丹華老人

蒲察世傑 金斡篤河人徙居遼陽多力善射能以拳擊牛折脅而死有糧車陷泥淖中  
七牛不能出世傑手挽出之宗敏爲東京留守召置左右海陵時爲護衛知其勇力陰  
許以非常之賞使有所誅鋤世傑曰臣自誓不以非道害物不敢奉詔正隆四年調諸  
路兵伐宋世傑往曷懶路籍數獨少海陵詰之對曰曷懶地接高麗若多籍其丁緩急  
何以爲備旋從伐宋擐甲佩刀腰箭百支持槍躍馬往來軍中敵人以爲神將後平契  
丹略隴右皆有功累遷亳州防禦使卒世傑疎財尙氣每敗敵眾必戒殺掠平居非忠  
孝不言親賢樂善甚獲時譽

李英 金遼陽人字子賢由進士調通遠令蕃部取民物不與值攝之不時至即掩捕之  
論如法宣宗貞祐初歷監察御史右副元帥高琪辟爲經歷官乃上書曰中都之有居  
庸猶秦之穀函蜀之劍閣也邇者撤居庸兵我勢遂去今土豪守之朝廷當遣官節制

失此不圖忠義之士將轉爲他用矣琪奏其書即以英充宣差都提控居庸等關隘悉隸焉英夜與壯士李雄等四百餘人出城緣西山至佛巖寺令李雄下山招募得萬餘人擇眾所推服者領之時時出戰英被召還遷翰林待制因獻策大槩謂居中土以鎮四方委親賢以守中都立藩屏以固關隘集人力以防不虞養馬力以助軍威愛禾稼以結民心明賞罰以勸百官選守令以復郡縣并州縣以省民力頗施行之

李希賢 元遼東人延祐間爲臨武令愛民禮士獄訟清明常語人曰君子學道則愛人自然生明能斷去任後邑人立石頌德題其額曰學愛

達實布哈 元高天錫孫諒之子成祖命世其祖父官以居喪辭累遷大司農英宗居東

宮布哈

原作塔失  
不花譯改

撰集前代嘉言善行名曰承華事略並繪幽風圖以進帝覽之獎諭曰

汝能輔太子以正朕甚嘉之命置圖書東宮俾太子時時觀省後退居於家卒

崔源 明人字本清其先世居瀋陽父文祖孝先明太祖時來歸源承父師訓通故典明習孫吳兵法永樂間擢武略將軍征下奴兒干撫安忽拉温野人征兀良哈達皆有功

洵升遼東僉都指揮遂家於遼陽景泰元年卒賜昭勇將軍

詳見墓志

崔勝 昭勇將軍源之子定遼右衛指揮使以功累官都指揮使協守廣寧中路子鑑舉

人開原參將鑑子二長哲進士次賢遼陽副總兵賢之子世武由武舉升都指揮同知

掌遼陽都司事

見遼東志

孫磐 明定遼右衛人字伯堅剛方有氣節弘治丙辰進士初試政即上疏言近日諫官

以言爲諱請定四等最上不避禍患抗彈權貴其次揚清激濁能補闕拾遺又次建白  
時政有裨軍國皆分別銓敍而粉飾文具循默不言者則罷黜之庶言官知警不至曠  
官時不見用知陵川縣抑豪強卹孤弱殫心風化徧立社學集養正篇小四書養蒙大  
訓悉刊布之陞吏部主事復上疏言今日弊政莫甚於內官典兵乞盡撤各鎮中官專  
以邊務責將帥不從劉瑾深嫉之遂免官瑾誅復起河南按察僉事值流賊猖獗撫臣  
知磐嫻將略資給軍餉鎧仗以致保障留都逼賊東殄於狼山磐籌畫之力居多

張升 明定遼中衛人聰明有雋才正統丁卯鄉薦任本學訓導改萬全都司儒學訓導

學宮有井不甘升疏鑿之冽甚土人呼之曰張先生井著有裔菴稿行世崇祀鄉賢祠  
顧能 定遼前衛人由進士授戶部主事擢員外郎生平不妄受一錢天順間通州放糧  
盡革諸弊成化初天下清官四員能居楊繼宗之次刻名於便殿金柱上  
徐景嵩 定遼中衛人明正德間進士尹咸寧陞戶部給事中彈劾不避權貴歷任河間  
知府山西按察使

畢恭 遼東人字以謙其先山東濟寧人巡撫王勳薦恭有文武才由百戶舉陞流官指  
揮僉事圖上方畧開設迤西邊堡牆壕增置烽堠兵威大振虜人畏服進署都指揮僉  
事奉勅守備寧前地方在任五年邊鄙寧謐尋擢掌都司事撫士卒革奸弊廣屯田興  
學校政平訟理至今稱之所著有邊城吟稿以疾卒上遣官諭祭翰林學士廬陵陳循  
爲撰神道碑

耿賢 定遼前衛人由指揮以功陞都指揮僉事備禦金復鐵嶺復掌都司印尋守備寧  
遠隨轉右參將分守開原善撫士卒不妄交際致仕歸時所屬惜其清苦各出己意餽

白金二千兩賢曰平生不受今受之何也遂面分之軍士感泣護送至家巡撫馬中錫驚歎曰非獨吾人不如雖古人亦難後卒葬杏山與其師顧能墓相近友人李遇春作師弟雙清墓詩弔之云一文一武兩清官師弟聯芳亙古難千兩臨歧亦不受一錢到底肯相干上卿仰慕人心服老豸推尊士膽寒宦海久遊歸弔晚臨風灑淚杏花殘祀遼陽鄉賢祠

胡忠 明遼陽人以指揮備禦廣寧累官中路參將轉分守錦義時承前帥韓輔經略之後邊患稍息忠訓練士卒益嚴防守毀淫祠浚城隍修學校延師儒訓飭武官子弟城北有淩河民病涉忠乃捐金築橋往來便之及去任民爲之立碑祀廣寧名宦祠

劉暉 字孟陽東寧衛人正德庚子充遼陽副總兵勦山東賊劉六等斬首九百餘獲被掠男婦牛馬器械無算滕縣爲立生祠陞右都督守山東癸酉江西桃源洞及東鄉賊王重七猖獗命挂平賊將軍印勦平之甲戌提督江西軍務生擒新塗賊首張元二進左都督擒獲奸細馮敬等得褒獎己卯充總兵暉性質朴敬禮文士擁節十年未嘗妄

殺一人孫大章武舉任都督同知

邱霽 明遼陽人字時雍天順進士官刑部主事成化中守蘇郡治未一年諸廢畢舉

胡深 明定遼後衛人天順進士授監察御史剛正嫉邪不避權倖成化間彗星見上言

大本未建異端太盛進退賞罰未公財用工役未省賑濟無策備禦無方凡八事上優  
答之又劾大臣商輅程信姚夔等奸邪不納爲忌者所中坐以按陝時杖殺人謫黔陽  
縣丞稍遷廣西鬱林知州卒崇祀鄉賢祠

崔哲 明弘治己未進士正德初知威州以德服遠邊陲無警改澤州毀淫祠廣儲蓄善  
獎後學課士有法官至監察御史

瓢守清 定遼前衛人爲撫順備禦以擒李撒哈赤功陞二級哈赤叩關獻盔甲願永不  
犯邊自此東邊安輯東人歷久思之

劉耀武 由舉人任香河令重學輕刑爲政務順民心民愛慕之

劉士璉 天啓丙辰進士崇禎間授平陽府推官慈祥豈弟多所平反

佟卜年 明萬曆進士知河間縣節用愛人除門則俵馬大戶三害邑人立祠祀之

李中梧 字燦字清順治初任玉田令多惠政升永平知府有以鋤斃人久未成獄令焚穀草血跡宛然讞乃定

陳儲賢 順治時任榆社縣令時瘡痍初復撫民慈愛蓋州王萊峯亦令榆社有惠政並祀之三立祠

蘇宏謨 順治中任長沙同知時兵民雜處加意撫輯甚得人和焉

周召南 順治中知汾州府時寇亂初定一以招徠撫綏爲務而武斷舞文爲民害者懲之不貸下教屬邑徭賦有常均當豁免者以告民甚德之

馬鳴佩 本邑人先世居山東蓬萊有馬英者仕明爲遼東保義副將因籍遼左衛天命六年克遼陽鳴佩隨衆投清隸漢軍鑲紅旗年十七以生員受知太宗召入文館理事天聰三年授工部啓心郎崇德元年甄別內三院列二等考滿授職雲騎尉順治元年擢山西冀南道歷任湖南道以戶部侍郎銜總督江南糧儲兼理錢法尋任戶部侍郎

改總督倉場侍郎累擢宣大山西江南江西總督旋以提督張天祿疎防失事坐徇庇降二級留任督勦後遣舟師間道出海與賊遇奮擊之賊潰擒其副將林正禮等獲船艦軍械俄而海賊再犯崇明港中隔小港官軍莫能徑渡鳴佩密令民戶出草束木板運港側以濟師焚燬賊船斬獲無算賊夜遁十三年招撫海賊黃卿等百餘人降其總兵顧忠副將黃忠董禮等連敗賊於浙江粵東等地嗣以目疾乞休晉職三等輕車都尉康熙五年病卒予祭葬祀江南名宦祠子雄鎮

吳守進 本邑人隸漢軍正紅旗初事太祖以功授三等輕車都尉世職天聰五年詔定官制設六部守進任戶部承政考滿晉一等兼漢軍世管佐領崇德三年改任左參政四年以事革世職解部任授正紅旗副都統六年隨睿親王征錦州七年擢本旗都統同劉都統之深拔杏山八年隨鄭親王征寧遠攻取中後所前屯衛順治元年叙功二等輕車都尉世職翌年敗明兵於揚子江遂克揚州及江陰嘉興叙功晉一等四年授定西將軍駐紮漢中五年八月卒年六十二長子國柄襲隨征湖廣有功官至副都統

蘇宏祖 本邑人隸漢軍正紅旗崇德三年由舉人授戶部啓心郎賜朝衣一襲免四丁考滿給雲騎尉順治元年授河南河北道歷遷山東陝西布政使三遇恩詔晉三等輕車都尉因事降二級十三年遷左都御史擢南贛巡撫擒山賊李廷玉下部議叙尋以老病乞休不許賊渠謝上達結海寇鄭成功併糾羅一鑑徐黃毛等賊踞廣東連閩贛宏祖會閩粵合剿計擒斬一鑑黃毛等七人遂進剿紅畬諭賊黨縛渠自首者免罪未幾賊縛上達獻誅之十八年遣遊擊王把什剿廣昌賊斬千餘級擒賊渠蕭來信等叙功加一級康熙元年以原官致仕三年卒賜祭葬如例

雷興 本邑人後歷正黃旗漢軍太祖定遼東興以諸生選值文館太宗設科取士興中式舉人授秘書院副理事官崇德元年特試內三院學士舉人生員興名列二等賜人五戶及牲畜等物尋任都察院理事官順治元年十月授天津巡撫時土賊李聯芳張成軒嘯聚滄州南皮間興同總兵婁光先督師進剿成軒等竄遁追至海口扼其去路賊驚潰投水死者大半復搜捕餘黨斬其渠魁散脅從歸農疏言大沽海口爲神京

門戶請置戰船以備海防議行二年四月調陝西巡撫時陝西當流賊李自成擾亂戶口散亡興招徠撫綏之疏述其狀上嘉獎之賜冠服裘馬三年肅親王豪格奉詔征四川師未至流賊孫守法等掠興安興急移潼關兵三百駐防商州復值叛鎮賀珍掠漢中興密檄漢羌道胡全才設備固守及肅親王師至賊皆竄遁上疏言隴州關山爲河西咽喉西安藩蔽應設兵分防控禦臨洮鞏昌與西番爲隣請暫留屯軍以防邊隘四年四月以疾解任十年八月起授河南巡撫未至任卒賜祭葬賜兵部右侍郎祀陝西名宦祠

羅繡錦 本邑人後隸鑲藍旗漢軍天聰五年始設六部由諸生授工部啓心郎天聰八年命禮部試滿漢人通文義者爲舉人繡錦與選賜衣一襲免四丁尋授國史院學士纂修太祖實錄崇德七年兼授佐領順治元年擢河南巡撫李自成之黨二萬餘掠衛輝懷慶而原武新鄉諸邑土賊復爲患繡錦同總兵祖可法等防剿並請敕八旗勁旅會豫親王多鐸統師征陝西上命取道河南相機剿賊諸賊或降或遁繡錦疏請以河

北荒地凡萬餘畝令守兵屯種二年十一月擢湖廣四川總督時湖南郡邑爲明巡撫何騰蛟等所據自成遺黨一隻虎等復寇擾湖北繡錦至荊州一隻虎被順承郡王擊走復來窺犯乃飭兵防勦屢奏捷土匪胡公緒踞八百洲四出焚掠殺署鹽道繡錦遣將分路進勦擒之復條奏增設鎮協移兵駐守事宜先是襄陽總兵王光恩獲罪逮問其弟光泰遂踞鄖陽提督孫定遼戰歿上遣侍郎喀喀木率師自河南進勦繡錦以兵會侍郎喀喀木復鄖陽五年總兵金聲桓叛湖南騷動常德辰州等復爲李自成遺黨郝搖旗等所陷繡錦奏留喀喀木駐守荊州而分遣總兵徐勇馬蛟麟等防守要地屢敗賊衆復疏言湖南叛服不常凡勢窮乞降之衆宜安插腹地以靖疆圉九年七月卒於官年六十有三賜祭葬如例贈兵部尙書廕一子入監

羅繪錦 繡錦之弟順治八年授通政司理事官十三年擢順天府府尹十八年遷貴州巡撫康熙四年繪錦以定例荒地招民間墾種三年後起科復經戶部定議各省荒地限兩年墾徧過期遣官履勘因疏言黔省雖開闢數年而連年逆苗倡亂攻勦頻仍不

能不借用民力又復疊遇水災通計各府衛新墾之地有一萬二千九百餘畝應照例起科此外請酌寬年限並暫停遣官履勘從之六年以年老乞休後卒於家

劉仲錦 遼陽東寧衛人後隸正藍旗漢軍崇德五年任佐領隨多爾袞圍錦州隨左翼兵迎擊敵兵至城下復擊敗松山杏山及呂洪山口各兵七年濟爾哈朗攻塔山仲錦率所部先登克之進攻杏山復以砲毀城垣城遂降叙功予雲騎尉世職八年三月隨阿爾津哈寧阿等征黑龍江瑚爾哈部克其博和哩諾爾噶勒都里三屯招降大小噶勒達蘇綽庫禪能吉勒四屯凱旋賜貂皮白金九月隨征明寧遠克中後所前屯衛叙功晉職騎都尉順治元年定燕京仲錦任戶部理事官兼參領七年授山東臨清總兵官加都督同知迭次征流賊平姜瓖功晉三等輕車都尉世職罔替復以考滿並三遇恩詔洊晉一等輕車都尉兼一雲騎尉十年改福建右路總兵加左都督鎮守泉州十一年八月以疾還京尋卒賜祭葬子芳聲襲

劉光弼 初冒姓曹隸鑲藍旗漢軍天聰五年任耀州城守尉從征明克城衝陣斬將迭

有功崇德五年任叅領以同侍衛李國翰等率兵奮戰下錦州克塔山杏山及附近台堡叙功予騎都尉世職七年擢副都統八年以征寧遠取前屯衛中後所功加雲騎尉世職順治元年隨大軍入山海關擊敗流賊李自成旋同都統葉臣等征山西克太原三年隨端重親王博洛征浙江拔金華進定福建乃還京五年授禮部侍郎尋隨征南大將軍譚泰討江西叛鎮金聲桓復南昌府譚泰奏以光弼署江西提督事六年平廣昌縣山賊招降僞官三十餘員旋特授提督時山賊張自盛洪國玉踞湖東劫掠光弼率叅將陳陞等往勦斬獲無算僞總兵董明魁郭承珉等率衆降七年八月三遇恩詔晉世職至一等輕車都尉十三年詔獎力捍巖疆著有勞績諸臣賜鞍馬弓矢等物以示優異光弼預焉十六年以老病致仕康熙十二年卒予祭葬子顯祿襲

馬如璧 遼陽東寧衛人隸正藍旗漢軍崇德五年任驍騎校前後隨睿親王多爾袞都統石廷柱鄭親王濟爾哈朗圍明錦州攻杏山松山各台堡克駱駝山寨又同叅政碩詹馳馬陷陣殺敵甚力明總兵洪承疇等合步騎十三萬來援錦州上親統大軍如璧

隨都統巴顏石廷柱徇塔山路以紅衣礮攻下附近諸台又取塔山杏山二城八年復隨鄭親王取中後所及前屯衛皆以紅衣炮攻城有功順治元年予騎都尉世職兼任參領二年隨英親王阿濟格勦李自成於陝西追至湖廣屢戰皆捷與參領劉仲錦擊走明總兵馬進忠等於武昌獲戰船十有一六年鄭親王征湖南時明桂王朱由榔據武岡自成遺黨李錦等皆附之如璧由岳州進長沙趨衡州屢擊賊復破賊寨於靖州如璧窮追遇伏戰歿議卹晉三等輕車都尉子純德襲世宗時入祀昭忠祠

段應舉 父思信天命七年清兵取廣寧思信投誠予騎都尉世職隸鑲藍旗漢軍及卒應舉襲職順治元年隨討叛鎮姜瓖以紅衣炮攻克汾州及太谷縣城師還授參領兼戶部理事官晉世職二等輕車都尉十年明晉王李定國將軍馮雙禮踞湖南寶慶周家坡僞秦王孫可望亦率衆來戰應舉同參領高鳴鐘奮擊敗之十七年擢鑲藍旗漢軍副都統康熙元年同將軍王國光赴廣東駐防潮州三年勦叛鎮蘇利衆萬餘於南塘舖同統領尙騎功左右夾擊復碣石衛城晉一等輕車都尉十二年署山東提督明

年命率兵赴杭勦禦耿精忠敗之於嵎縣七月授福建提督迭次擊賊僊居黃岩太平樂清進圍温州皆奏捷十五年隨康親王征福建耿精忠降翌年擊敗漳泉興化之海賊鄭錦並招降仙遊惠安等縣攻復興化泉州二城復分兵定漳州府及海澄等縣十七年賊將劉國軒吳淑陷平和縣都統穆赫林戰失利還保海澄上命仍以副都統從征賊衆併力犯海澄應舉同穆赫林固守糧盡城陷並死之子牧臣襲世職世宗時入祀昭忠祠

能圖 滿洲正紅旗人姓納喇氏順治元年譯遼金元三史授弘文院侍讀尋遷學士充太宗實錄副總裁晉職輕車都尉奉命慰諭吳三桂還命教習庶吉士遷左副都御史加少保嗣以奏請更定世襲例褫少保十五年擢左都御史翌年獎諭能圖奉職勤勞加太子太保奉旨以金三十萬賑雲南後因事罷任卒於家

按能圖即能吐巴士漢之子

柯永昇 永盛之弟由員外郎出任湖南糧道康熙十九年遷江西按察使歷遷安徽布政使擢湖廣巡撫時裁湖廣總督令督標兵老弱者歸農強壯者候缺食糧五月永昇

甫之任裁兵夏逢龍結眾作亂突入巡撫解署永昇被傷乘間自縊死世宗時入祀昭忠祠又柯永新爲先澤令亦死難事詳孝義內

劉清泰 隸正紅旗漢軍初名朝卿太宗賜名清泰崇德六年由諸生試一等入內院辦事順治二年擢宏文院學士歷充纂修太宗實錄副總裁會試副考官教習庶吉士尋授浙閩總督時鄭成功據廈門陷漳浦海澄南靖上以鄭成功父芝龍於大兵下閩時首先歸順何忍甘蹈叛逆此必地方官不善開導致彼反側因命芝龍作書遣人往諭勅清泰宣諭招降十年二月清泰疏劾巡撫張學聖巡道黃澍總兵馬得功前此偵成功赴粵潛襲廈門攫其家貲致成功索償修怨連陷城邑學聖等並罷黜三月得成功報芝龍書因疏言成功妄覬浙東粵東語涉浮誇與其更張於旣撫之後不如詳慎於未撫之先得旨仍相機而行會頒勅招撫成功封爲海澄公清泰疏請於閩浙調兵一千駐守浦城增設遊擊守備等官復疏言成功無歸誠實意宜敕遣八旗兵赴閩駐防要地以資策應旋以病乞假成功復寇掠漳泉二州御史龔鼎孳劾清泰借病息肩致

海疆被陷部議革任康熙元年起爲秘書院學士尋授河南總督築開封城疏請官民捐輸者按季報部錄叙以免觀望復以報墾荒地一萬二千餘頃加銜兵部尙書四年以疾致仕八月卒賜祭葬

馬國柱 隸正白旗漢軍天聰八年舉人賜衣一襲免四丁入值內院崇德三年授都察院理事官順治元年授山西巡撫疏請錄用明廢官巡撫張鵬雲苗胙土陳昌言太僕卿王邦柱等歷平汾州平陽等府州剿土賊閻汝龍高九英招撫四十餘寨擢宣大總督調江南江西河南總督迭次剿平土賊叛將泊明石城王朱統錡與諸僞將等剿撫兼施卓著功績六年江南河南雹災疏請撫勘蠲卹得旨嗣後遇災卽察明奏卹勿泛奏候旨遲於察勘著爲令又疏言江南既改爲省南京國子監宜改爲江寧府學仍支學田租銀以供祀事七年加太子少保十年疏言州縣錢糧由府解司所以察核完欠重郡守之責成請於解府之時府但編號記簿勿庸折封換批則勒索挪移之弊可絕加太子太保以老致仕康熙三年卒賜祭葬入祀江南山西名宦祠

耿 焯 字青藜初爲明貢生後流寓湖廣順治二年英親王阿濟格統兵追擊流賊收

湖廣諸郡縣焯投誠令隨總兵金聲桓收江西委署布政使尋署巡撫明年尙書孫之  
獬以焯著有勞績與巡撫李翔鳳交章薦之命赴京擢用四年授順天巡撫四月昌平  
土賊韓顛克陷南皮焯檄張鎮討平之尋疏請增昌平台兵餉五年擢宣大總督疏請  
分別豁免雲中民田屯田糧額未幾因姜瓖之叛降調七年授山東布政十年以大計  
卓異擢通政使明年命爲山東巡撫考滿加兵部侍郎銜後被劾革職病死

張長庚 字壽菴漢軍鑲黃旗人順治八年由編修歷遷學士擢湖廣巡撫以報墾田議  
敘十五年荊襄岳等府水災爲之請蠲賑次年復同總督李蔭祖倡賑捐自捐米錢各  
若干加太子少保兵部尙書銜尋督湖廣康熙二年同將軍穆里瑪圖海等擒斬明桂  
王將郝搖旗劉汝魁其黨李來亨竄茅廬山自焚於是招撫餘黨以書降其荊國公王  
光興等楚平六月上諭各省大小船按兵定數疏言湖廣戰馬礮船四百七十五分別  
留裁如所請行十九年大兵進勦雲貴上以長庚於軍中著有能聲命署副都統會川

東譚洪復叛命兼程赴彝陵擊賊旋以夔州乃運糧要地令同統領佟佳速取夔州洪死餘黨就戮川東平撤回未幾卒

徐國相 字行清隸漢軍正藍旗家於城東北五十里之山藥舖由生員以順治十二年授戶部他赤哈哈番十七年授佐領次年陞參領康熙元年授刑部雲南司郎中二年陞山東右布政歷江南安徽等處布政使十六年巡撫安徽繼遷湖廣總督生而奇偉負性高爽明通有經濟才其爲政以安靜和平休養生爲重楚人被其德至鐫石以紀功德卒後桐城相國張文端公英手製神道碑文臚陳政績以一代偉人目之子岳官闕中知縣

劉承義 順治四年任錦寧廣等處招民佐領駐錦州招民四百餘戶以功予世襲佐領  
劉文亮 承義子蔭生以父功襲職順治十五年仍駐錦招民墾田康熙三年始設縣知  
錦縣四年升兵部主事

孫茂蘭 遼陽左衛人順治四年任山西左布政時駐防兵圈民地胥以廢藩士田給之

而屯丁多抗租乃繩之以法民得安業遇兵民相搆以理訊之咸得其平

柯永新 清初知光澤縣邑有豪猾引江寇入境爲亂永新詣府鎮請兵密設奇計直搗賊穴擒其渠魁餘黨皆散

穆清格 烏蘇氏隸滿洲康熙間爲山海關城守尉世有顯者城東穆家墳村因其墓而  
得名父渣奴特拜他喇布勒哈番

董秉忠 漢軍正白旗人康熙間累官奉天府尹二十三年甲子奉詔偕將軍伊巴漢副  
都統穆泰佟寶等修輯盛京通志充總裁著有盛京通志序

今其墓在城北門外小堡碑已不存

楊廷耀 康熙四年任吳州通判土賊唐三蠻等屢劫官餉捕斬之盜遂息分權梧關刊  
定稅則按往來船戶人給一錢吏役乃不敢苛索署容縣事李定國餘黨竄踞大榮山  
連結猺獞廷耀以計擒逐遠近帖然

楊醜 漢軍正黃旗人字靜山善騎射挽十石弓康熙時官固安令將調任適聖祖出巡  
百姓遮道乞留得許可累擢麗江知府皆有善政官至四川巡撫乾隆初罷再起光祿

少卿 另詳文藝

王奕曾 清遼陽貢監康熙十七年知錦州事二十一年升直隸永平灤州知州 見錦府志

傅星 蔭生康熙十八年知承德縣事

汪燮元 汪騰龍 皆遼陽人康熙十六年後相繼任醫學正科

李建榮 監生康熙二十二年任鐵嶺縣知縣 以上見盛京通志

王宏仁 康熙十三年以湖州知府調衢州時耿精忠叛衢爲閩衝要滿漢將士畢集宏

仁調度供億不擾於民指陳方略動中機宜又力請蠲賦賑貸民感其德

金培生 康熙間知鶴慶府問民疾苦地方旱澇宣洩之事身親任之又設義學十餘所

在任三年奸民斂迹折獄無冤士民思慕之

汪善 舒穆祿氏滿洲鑲白旗額駙武勳王楊古力之叔父也先世居長白庫爾喀同清

太祖取遼陽入宿衛後奉令駐東京陵次候旨聽選及歿遂葬焉勅封都督

滕天授 康熙三十五年知漢中府修復學宮及倉廩漢南素饒水利天授相度地形築

堤建開以時宣洩界畫分明爭端永息

朱倫瀚 字涵齋一字亦軒明宗室入清隸漢軍正紅旗康熙壬辰武進士官侍衛以書

畫兼直武英殿養心殿改郎中出知浙江寧波衢州升督糧道以御史用署湖北驛鹽

道復入爲御史兼公中佐領遷給事中擢副都統署侍郎卒年八十一

另見文學

許弘勳 字無功廉靜有大度初知紹興府涖任一月值閩亂竊發越屬暨乘新三邑奸

民嘯聚圍攻郡城弘勳率兵夜出殲縛渠魁慰散其黨累遷雲南按察使康熙二十七

年楚北兵譁漢卒張麻矛搆亂期以三鼓發弘勳知其謀白督撫徹夜無三搗捕斬亂

首數人兵民帖然

劉德芳 康熙四十三年官四川按察讞決平允兼權茶鹽參籌盡善歲無停滯葺文翁

石室爲錦江書院一時人士翕然向學

佟國正 漢軍廂黃旗人曾祖週望遼陽有白雲如蓋遂由撫順徙居焉父方年死難時

國正甫六齡順治七年由拔貢授江南無爲州知州遷直隸大名知府陞廣東南韶道

調陝西延綏靖邊道牒陳四事巡撫張中第據牒以聞下部議從之康熙二年改補江南淮海道尋遷安徽按察使江西布政使時吳三桂叛兵犯江西會巡撫白色純卒大將軍安親王岳樂奏國正甚得民心特擢江西巡撫十五年以贛州爲江西門戶投誠將士雜處彈壓需人奏詔國正赴贛州駐守會廣東從逆提督嚴自明等糾衆徧南康黃士標等擁兵犯信豐國正相繼遣副將許盛守備楊以松等剿破之先後復縣城降僞官繼聞大兵克復汀州國正恐海逆竄入贛州遣參將劉體君等由間道相機恢剿十六年招降僞總兵賴鼎球賴榮等一百七十餘人兵二萬七千餘逆賊韓大任等自甯都敗竄萬安國正慮逸入楚境密調兵赴良口等處截其歸路別遣將繞道大江口斷其糧道賊窘甚復以遊擊楊以松等四路進剿十七年正月追至老虎洞大敗之大任窮蹙走汀州詣康親王傑書軍門降江西平國正回省城八月叙功加兵部右侍郎銜十月加兵部尙書銜授正一品階四十七年卒於家

佟世思

字儼若先世居佟佳地方兵部尙書國正之次子康熙壬子停八旗制科以任

子得官丁卯爲臨賀令庚午調思恩令卒

石琳 字瑯公石忠勇伯第四子由佐領兼郎中康熙元年按察山東左遷湖廣下江南道十三年襄陽總兵楊來嘉副將洪福叛應吳三桂踞房縣保康嘯聚南漳之天門等寨琳及總兵劉成龍討平之累遷江南按察浙江布政其在河南也值禁旅南征時當麥秋琳與統軍約令次於野不得入市坐帳中凡四十餘日民賴以安在浙時耿亂初平戶多逃亡而丁賦猶責之里甲乃核實請免之並除一切陋規禁加號嘗曰革一分火耗即增一分正供時以爲名言二十三年擢湖廣巡撫會建太和殿檄廣省採柵木松木琳以採運維艱請展限部議不許特詔允之後調雲南疏言賦役全書中有應更改增刪者八事一屯田官田較民賦十數倍宜改照民賦上則起科一滇省鹽井有九明未額外橫徵較原額不啻數倍請減黑白二井之課照琅井例征收一開化府民田每畝科糧二斗六升三合較未設府前加至十倍應照河陽上則起科一元江府由土改流三桂額外立名色四端請各減一半一通海縣六寨地糧賦重三倍應改照新定

科則磔嘉縣每糧一石征條編銀四兩有奇今既歸南安州附征應即與州賦一例每石征銀一兩四分一麗江界連土番三桂割喇普地與蒙番地去而糧存宜刪除一建水州明參將歲派陋規銀三百餘兩糧八十餘石三桂遂編入正額宜裁革一新平銀場易門銅廠礦斷山空宜盡豁課稅疏下所司知之擢兩廣總督粵東饑乃通糴放賑全活甚衆瀧江隄潰刑馬沈玉禱於江躬負薪塞隄水即退在粵十四年善政甚多薨于位年六十四賜祭葬如例入祀名宦祠

石文晟 字公著號絅菴忠勇伯長子綽爾們之子也豁達多才略爲政務舉大綱由同知擢知雲南開化府請反流亡三千餘口丁憂服闋起知潮州府擒撫海盜盜魁吳岸之臨刑大呼奇其言釋之盜爭就撫潮民深德之祀之如韓昌黎尋改平陽知府康熙中嘉其居官有聲擢貴州布政尋撫雲南疏言滇省屯田賦重非軍戶頑抗亦非有司不善催科也通省惟河陽賦重上則每畝糧八升一合有奇屯田則五倍之且有八九倍者查照河陽上則以甦積困報可減十之六又請增鄉試解額以振起人文三十六

年冬入覲會安南國王黎維正言牛羊蝴蝶普園三處爲土司侵佔請歸還文晟奏謂普洋自明時內屬我朝闢雲南在蒙自征糧後改歸開化府並非安南地不可許又陳不便於民者事悉行久之改廣東巡撫尋擢湖廣總督卒年七十七

黃秉中 字惟一先居海城徙居遼陽隸漢軍鑲紅旗康熙間知山東范縣累擢御史所條奏皆關大體四十七年任浙江巡撫值大饑懸禁不得抑米價並請開內洋販運由是米商日至民食乃足去任後民感而祀之又調福建巡撫子廷鑑廷鈺廷桂

楊文乾 其先山東沂水人徙遼陽隸漢軍正白旗湖廣總督宗仁之子由監生歷授東昌知府榆林道雍正元年隨父任三年授河南布政奏言曹州桃園集係直魯豫交會請以曹州州同移駐彈壓擢廣東巡撫在任守制奏布政朱絳倚總督孔毓珣姻親虧帑又奏盜案塵積請概爲速結四年奏粵多盜請將滿漢兵民編查保甲又疏言旗兵閭尚義搶穀毆傷監糶官將軍李杅不能約束上命侍郎塞楞額阿克敦往審得實杅等俱論罪又疏請民戶就糧管業不致詭寄飛洒諸弊丁銀盡歸地糧永免無糧徵丁

之累又奏廣東米不敷食應酌量要地建倉加貯穀米又請秋審三次緩決者減等發邊爲民上以爲應嚴者不嚴則應寬者必不能寬駁之又粵省每年辦公六七萬兩於火耗提用奏言臣商督臣及司道節裁需四萬兩由推糧過割公費及奉裁衛所屯糧陋規兩項提用其火耗戩頭併封積零等項分別爲修戰船及督撫司道州縣養廉及布政衙門工食俱用上以爲利不十不變法害不十不易制未允行五年八月奉命同浙江觀風整俗使許容等查閱倉庫虧空文乾疏閩省八府福泉漳爲最要所報無虧空州縣亦恐挪新掩舊必將各員交錯調用盤查本身一離原地諸弊盡露尋以查辦官虧毫無瞻徇從優議叙廣東盜風日熾奏罷署撫常資將軍石禮哈徇庇上諭云如此據實陳奏方是復以閩省虧帑案前後叅革改教休致五十餘員疏請分發熱諳民事者補以要缺得旨嘉許及卒上以其才識優良辦事勤敏優與卹典賜祭葬事詳國史

楊應琚

文乾子雍正七年由廕生授員外郎歷西河西寧道按察使布政使乾隆十六

年擢巡撫逾年署撫山東奏墾沂州府屬荒地千三百餘頃沂登二營改習鳥鎗弓箭尋以奏辦運南河料物全竣著實授嗣由河道總督調著兩廣奏粵省濱海外海戰船按期會哨但必於搶風趁水看雲審潮一一練習始能臨事從容現今切實督訓報聞歷奏准出洋貿易良民回籍瓊州平糶倉穀不拘秋末夏初應於船多價平時補買不准陸兵改水師以免倖進暹羅貢使毆傷通事國王派通事呈報禮部應將原文發回無任陪臣越申又粵西興安陡河壩塌土漏湘水不能分注灘江楚船至全州即不能進於民食有碍又興安城下隄岸衝刷恐及城垣臨桂陡河下達柳州爲溉田運船要道今俱頽淤請動帑修築廣東虎門寨西南達諸番東北通浙閩其城遙對老萬山至橫檔實粵東門戶請移左翼鎮改爲外洋水師稽查洋艘操練巡防於海疆有裨二十年調督浙閩加太保越二年調督陝甘籌備倉儲備補軍馬屯田伊犁招商開採肅州鴛鴦池石炭庫車回民戶歲納布一疋值歲歉以棉子充食請購棉子令佈種晉太師奏請募民墾喀喇沙爾以西地畝令遷徙者復業召無業回民赴巴爾楚克耕作阿

克蘇葉爾羌兩處各派千總一員駐紮俾東西千里聲息相通俱得旨嘉獎復請阿葉兩處及伊犁各設兵備道總兵從之二十六年疏請撤南路臺站歸北路並撤駐哈密大臣永寧等上以哈密重地應重臣彈壓未允翌年歷請移淵泉府治於敦煌以便輸運改烏魯木齊副將爲總兵涼州留副都統莊浪設城守尉次年依奏將蘭州撫署改爲督署兼管撫事以資居中節制三十一年調督雲貴以征莽匪緬甸事失機不克以功名終事詳國史

李

瀚

字文瀾又字受川先世居遼陽隸內府鑲黃漢軍雍正壬子舉人初選山東榮

城知縣調諸城歷遷膠州知州武定知府沂曹道擢江西布政使三十七年奏停編審造冊照例五年編查以杜漏戶避差之弊嗣攤丁於地康熙間又有永不加丁賦之諭則編審不過虛文而戶口歲增經各督撫專摺奏報民穀細數可以按冊而稽因此永停編審著爲例又言州縣額設教職二如該員有同族親友後銓選一處難免瞻顧之私宜迴避下部議行載入則例尋護理巡撫奏請古鑄消磨殆盡與私鑄者不同應照

兩江總督高晉奏准之例凡古鑄聽從民便停其收買如有私鑄私販仍同小鑄一律查禁又言欽天監所頒時憲書按省次序如盛京所屬及蒙古扎薩克平定準回部各處均分別刊載今江南已分爲江蘇安徽湖廣已分爲湖南湖北陝西已分爲甘肅其太陽出入晝夜節氣時刻各省不同請照盛京所屬尼布楚城等處之例各按分隸省城之地圖北極高度定緯及地之經度所列於時憲書內添注省名分晰開載以歸畫一四十年授雲南巡撫五月卒

王 縉 字冠美父天祿有善人之稱雍正間縉由附生補禮部官學教習乾隆二十年授深州學正訓士有法州守鄒雲成因公外出煩縉代理適有逃兇命案謂幕友曰若知太守外出必徘徊未即逃急捕可得緩則遠颺如言差捕果得鞫之遂具服鄒在保陽聞之急歸則已定讞歎曰如此才而爲學博屈君久矣平日留心書畫子爾烈克紹前業焉

王 組 字鸞佩縉之弟雍正癸丑進士授刑部主事陞郎中清慎明決遇有疑案司寇

必以委之其訊鞫不以刑求善爲開導囚自輸服凡所平反皆莫能移易前後駁案得議叙紀錄八十餘次爲一時所無乾隆十五年二月任甘州府陞見純廟勗之曰甘州要地爲一方之屏障其勉之行當擢道員也至甘州見邊地瘠苦以養民爲務興利除弊案無留牘時歷州境問民疾苦民稱之曰活佛尋調涼州百姓送者絡繹數十里會西番蠢動撫軍鄂公稔知其能檄議事甫行卒於逆旅

侯元勳 世居邑北雍正五年由貢生授曲周訓導在任捐廉修 崇聖祠重修學宮建

梓潼閣多所設施推布條教訓士有方官至河南知縣著有政聲又據查弘勳中式乾

隆初某科舉人

佟毓秀 字鍾山隸漢軍鑲藍旗仕至甘肅巡撫

名家書畫錄襄平人

朱孝純 字子穎倫瀚子乾隆壬子舉於鄉知四川簡縣擢叙永同知重慶知府移守泰

安遷兩淮鹽運使

王德純 字景文號穆齋世居城內雙井街乾隆癸酉拔貢考取覺羅學教習期滿以知

縣用揀發安徽署合肥縣事尋署安慶通判二十五年題署建德縣事一年結積案甚多有監生某已葬數冢於山麓山主屢控不休案累三十年經十餘任未結德純查其譜系核其所葬年月知其爲僞藉以圖賴山場立命發冢惟亂石而已乃折服平日亦多善政民爲之立生祠

佛爾果春 完顏氏漢姓汪世居邑南杜家窪子少嗜學嘉慶二十二年補博士弟子員考授盛京刑部筆政保題主事授員外郎以勤慎著名京察一等子呈瑞舉人

王爾烈 深州學正縉之子字君武號瑤峯少承家訓性行純靜篤於孝友乾隆進士二甲一名授編修歷官御史內閣侍讀充四庫全書處及三通館纂修嘉慶元年預千叟宴蒙御賜詩並集古三星圖如意鳩杖等四年以大理少卿致仕掌教瀋陽書院六年卒工詩文善書宗法羲獻其父亦工書畫官深州時遇同官慶賀輒作畫命之書韻語以贈得者寶之至今中日人獲其墨迹更如拱璧焉

清祕述聞  
云字仲方

金朝文 隸漢軍世居城南孫家寨村嘉慶間仕至都察院左副都御史誥封光祿大夫

王福綸 字雲鵬居城內雙井街少負才名嘉慶癸酉拔貢由七品京官歸戶部歷階主事員外郎中道光二十年遷內閣侍讀學士晉太僕寺少卿咸豐三年卒於官年六十六有六樞回籍奉旨沿途地方照料服官四十年以鯁直聞好危言動忤權要嘗與大學士穆彰阿之子某在某府宴飲醉語忤某怒幾落職然府道缺出即以次應補亦不可得直道難容亦危言取禍洵然

王福綬 字印潭福綸弟道光甲辰舉於鄉後授武清縣教諭國子監典籍銜性犢直不肯與時俯仰服官三十年終於教職年八十一卒於家

劉名震 字惺楷又字駿聲城東後沙澍屯人初入邑庠清嘉慶辛酉科拔貢充盛京覺羅學漢教習加理藩院同知銜任四川捷爲縣及成都縣知縣擢龍安府知府在蜀歷官幾二十年爲政嚴明去後人猶思之

劉文麟 字仁甫號仙樵名震長子七歲讀書目數行上讀孟子謂之一夫句瞪目問師曰果可不謂之君乎道光丁酉戊戌聯捷南宮分發廣東知縣林文忠大器之委署平

遠攝長樂縣事補文昌再選河南沈邱沈與皖之阜陽接捻匪出沒履任月餘盜賊屏跡因揭稟積年虧帑不合上官意入計典降調計到官九十九日耆老籲請於太守曰周敬修官阜陽沈邱無盜今劉令官三月沈邱無盜阜陽亦無盜願爲百姓留弗省又走詣闕或以留官非例沮止之母張氏先歸京師狀其事御史中丞李文恪密疏請派員往辦當事者懼陰重賄使誣伏文麟曰不能爲國家塞漏卮忍取賄誣母誤控耶竟以掩覆結案遂歸里奉母時髮逆方熾海氛甚惡每談時事聲淚俱下主講瀋陽書院五年倭文端甚敬重之

另見文學

愛興阿

字溥堂滿洲鑲藍旗人居城北石橋子由舉人擢山東道監察御史

王煥辰

字曉山王世芳第六子由附貢議叙授河南臨潁縣知縣升任許州暨鄧州直隸州知州所至皆著循聲人有囹圄空虛麥秀雙歧之頌咸豐八年回籍終老

王煒辰

字旭川世芳第九子道光己酉拔貢朝考一等以知縣用分發廣東候補知縣

升任貴州甕安縣知縣署理興義府補授黎平府知府

李全順 字樂亭世居城東摩天嶺少好學家寒遂棄儒充差由領催効力軍署刑司幾二十年補中後所校政越四年提升撫順防禦兼路記尋陞佐領委巡東邊回省管理正黃旗界務咸豐三年奉旨稽查南海旋署牛莊防守尉四年代理復州尉篆旋署興京尉篆凡歷外任十餘載著有成績九年調盛京鑲黃旗佐領掌辦刑司印務兼發審處總辦時盜案迭出督同各員隨審隨結弊絕風清大憲嘗稱之曰能年七旬任昭陵四品官次年擢右翼協領欽加副都統銜總理營務等處昕夕從公老而不倦年七十三告歸卒誥授武功將軍晉封武顯將軍

馬有利 字巨川隸漢軍鑲白旗居城西大落虎莊幼讀書兼習滿漢文由官學生補馬甲歷任校政防禦佐領同治十二年補金州水師營協領四年幫辦丈放鮮圍場荒務事竣授海龍總管創修官署營房撫輯墾戶安置旗民釐定課賦多所設施賞戴花翎加副都統銜在海龍任十年以足疾告歸年七十有七卒子鴻翎候選理問

哈隆阿 滿洲正藍旗人居邑北藍旗村補領催以剿匪有功升金州驍騎校咸豐初從

軍勦粵匪先後十三年駐南京江淮等處迭著戰功原帶旗兵生還無幾事平升防禦兼護理本城城守尉適邪教趙錫百擁衆攻城與知州張鼎鏞日夜防守賊眾稍退乘而擊之餘黨悉散錄功升佐領未幾卒

成殿鰲 字奎垣漢軍正黃旗人居城北河工堡起家小校歷官盛京副都統至協領純玉 張氏字崑山居城東沙坨子村由制兵洊陞鳳凰城防禦

楊玉美 字潤齋隸漢軍鑲白旗少貧嗜學同學申精阿嘗推食食之道光初由制兵補驍騎校充法庫門捐輸員適嚴冬大雪按車收捐車滯於門車戶露宿守候人畜至於凍斃玉美密飭寬其查緝車戶遂不免偷越同寅或以爲不可乃曰國稅固重人命詎輕儻有過余自任之比差竣據實上陳並涓滴歸公深蒙嘉許焉洊擢正藍旗協領賞民加正三品掌戶司印鑰十餘年咸豐朝以金州重鎮特簡爲金州水師營協領二年軍安輯尋告休居林下卹孤憐貧待申氏尤厚同治初卒於里第年七十三誥授武義都尉晉武功將軍子震字春霆不仕居里解紛排難光緒十年卒年七十三賜封武德

騎尉孫四長東華績學早世次東藩出嗣三東維四東翰縣丞皆能世其家

楊霖 字雨霏玉美之猶子官驍騎校因剿平土匪擢叅領加四品銜署開原防禦年七十五卒於官嗣子東藩

阿爾京阿 姓瓜爾佳氏隸滿洲鑲紅旗先世由長白從征駐防遼陽居城北于仲堡遂家焉由驍騎校累遷熊岳防守尉錦州協領連陣及三座塔之戰以功賞戴花翎記名副都統子二惠格德勇

惠格 字式堂由筆帖式三遷至郎中歷任江西袁州山西蒲州浙江嘉興衢州山西平陽等處知府於袁州任內破八卦教保花翎二品頂戴候補道年六十五卒於江蘇高郵州子一榮蔭候補縣

權宜 字煥辰薩察氏隸滿洲旗籍駐防遼陽居邑北白三家子賦性剛方勇敢有爲清光緒初由制兵遞陞中後所掌路記佐領歷任鳳凰城復州防守尉卓著政聲平生無私蓄惟以清白傳家年六十八歲卒於官誥授昭武都尉晉封中憲大夫

王巽謙 字和圃世居城內河南院世芳第九孫由軍功班歷任河南商城縣知縣有惠政商城爲之立生祠

時尙春 居城南沙河候補協領任海龍城左翼翼長

馬爾濟 約哈納氏乾隆間由鑲藍旗協領署本城城守尉

剛察色 居城東新城任滿洲鑲藍旗防禦

劉耀先 居城東南媽媽街漢軍正紅旗人金州水師營協領

劉清俊 字雅亭居城東南上堡漢軍正紅旗人任白旗堡防禦

胡武雲 字輝山居邑南大甸子村隸漢軍正黃旗歷任佐領鑲白正藍旗協領

多倫 字文閣依爾根覺羅氏居東京陵歷陞內閣中書加四級保用內閣侍讀

承平 字泰階白氏遼陽駐防滿洲同治壬戌舉人性聰敏幼受父奎榮庭訓敦品績學

甲子以後里居教讀從學者如孝廉錫庚奎光科興額皆一時知名士戊辰歲補筆政歷任遼陽倉官京工部主事兵部員外郎江南道監察御史辛丑轉山東道乙丑擢給

事中記名道在臺諫守正不阿杜絕請託故終身清貧年七十有三卒

王文蔚 字秀峯居城西兵馬屯由舉人大挑知縣籤分湖北任崇陽縣知縣卒於官家人扶襯歸葬書籠襪被外別無長物其第三子紹先現充中東鐵路督辦公署科長

錫壽 字仁山清宗室居本城內光緒甲午充鎮東營統領

李春溪 字小梁居城南七嶺子由歲貢生從戎光緒甲午充鎮東營營官議和後家居課子自娛卒年四十九

程克昌 字五卿居城西南高占屯歲貢生光緒甲午充鎮東營營官

沈宗漢 字新泉由附生從戎光緒甲午充鎮東營營官

朱登甲 字曉樓武庠生居城內五道街充鎮東營營官

李樾 字乃武居邑南大打白狐光緒間充敵愾前軍營官

鍾麟 字夢星蒙古人居城東達子營由進士分發湖南知縣革命軍起殉難幸御下有

恩署中吏役將其子婦及二孫三人送出得免

事詳行述

高士英 字華亭居城東釣水樓由附貢候補直隸州知州任山東知縣及鐵嶺縣知縣  
徐星朗 字奎武居城東峨嵋莊由副貢歷任山西太原府膠城縣知縣民國初任輝南  
西豐縣知事卒於官

邢國弼 字巨川居城西南揚氣堡由供事歷任甘肅通渭知縣慶陽西甯等府知府民  
國乙丑由奉天回甘肅任稅捐局長被盜害

回長廉 字心泉號介甫先世由直隸永平府遷遼陽居城西三岔子少貧年十五其祖  
父有所感憤令其立志讀書入塾三載能涉筆成文二十五補博士弟子員公車數上  
不第居里課徒課餘兼從事田畝夜間燃香照讀年四十九中式光緒乙酉舉人丙戌  
登進士籤分湖北歷充鹽務關稅等局差清廉如寒士旋任長樂縣昕夕聽審獄無滯  
囚案無留牘因勞致疾半載去任去之日人民恭送衣繖依依不忍去云生平廉謹自  
持一介不苟卒年六十有二

楊惠齡 原名桂年字香圃居城東虎頭崖初爲州戶科吏爲歷任官所倚重遇鄉里爭

訟務令和平理處甲午庚子兩役與地方士紳辦理善後事宜著有成勞經盛京將軍裕保獎以知縣用旋改補都察院經歷在官十年辛亥鼎革回籍卒年七十有七

袁鎮南 字保臣號辛坡居城東葭窩由庶吉士散館知河南桐柏縣事邑瘠苦甲通省有常平倉穀二萬石粵匪亂燼於火歷任循案仍報存至即據實揭陳癸未調永城縣境連渦蒙蕭颺多盜首嚴捕務獲巨盜十餘人置之法地方以安旋宰祥符缺繁而瘠恒苦因公致累自度惟須儉以養廉欽使洩豫領供給費取足支銷一洗從前沾潤之弊乙酉調河內月餘結積案二百餘起丁亥秋沁河汎報奇險乃督工搶護晝夜步履風雨中泥水沒脛並於天師廟工段築石堤爲久遠計至今呼爲袁公堤邑人爲生祠於潮音寺無何下游武陟小陽莊與黃河鄭工先後決曹觀察秉哲調督陽莊西壩較東壩工堅而費省倪撫軍敍功疏聞旋回祥符本任庚寅擢刺光州轄光固息商四縣在任五年發奸摘伏民無冤抑屬丁親憂奉雙轎歸里值庚子變從鄉里請起辦民團起復回汴充院署總文案檄署開封經巡撫錫專疏保薦交軍機處存記癸卯二月河

南附屬爲錢糧改章郡民抗拒奉檄單車之任率屬諄切示諭皆帖服甲辰典懷慶兼  
懾清化鎮鑛局總辦內政外交措置咸當除南陽府適唐縣教與教閱乃集訊和結各  
領事咸敬服焉鄧州民鬧署官實激之院檄往治以鄉愚被脅分別薄懲具報以爲寬  
遣員復按獄具卒如原議宣統己酉調開封全省讞事率歸審訊京省控案積四百餘  
起三閱月訊結三之二辛亥春兼任巡警道是冬簡授開歸陳許鄭道蒞官先後三十  
年迭邀卓異嘉獎議叙十一次充癸卯恩科借闈河南會試內收掌河南鄉試四科同  
考官民國初解職僑居濟南十有三年卒年八十

奎 光 撒哈喇氏字書五號珠泉居城南喇嘛園村由舉人大挑七品京官山東補用  
知縣充癸巳山東鄉試同考官所取多名下士歷署東平新泰壽張各州縣所歷政平  
訟理時有奎清天之譽在東平州時慎重河防興修民埵並陽穀壽張各縣得不出險  
各沿河民至今稱道弗衰洩新泰時東平士紳越數百里來祝壽蓋德澤感人深也清  
鼎革退居濟南之明湖終日遨遊山水卒年七十有四

魁 福 胡氏漢軍旗人世居邑西南小台子少嗜學殫心宋五子明清先儒語錄延忠

恪督學奉天科試取第一旋食餼光緒戊子領鄉薦甲午事起徐州慶璋成鎮東十三營委充鷹字右營管帶以防禦功得旨嘉獎旋分統前左等營防遼南八盤嶺等處與日軍力戰哨官李襄閣死焉敵終不得逾嶺北旋和議成紳民請駐紮騰鰲堡地方賴以救平嗣鎮東營遣散乃以揀選知縣奉檄辦理延吉招墾兼金廠總辦數年墾戶雲集延忠恪嘉其勞歷保同知花翎四品銜庚子亂回籍舉辦鄉團勦撫兼施又因俄兵下鄉藉探買搜搶敲詐民財爰與俄官申明約束遼西始獲安集逾年有令散撫團編保甲復聯一百五十餘屯成一大團改爲保甲局同遼海地方官赴河西勦匪杜立山就撫甲辰日俄戰有匪襲擊俄兵奪其槍俄誣爲甲丁所爲徑襲保甲局魁福身被重創鄉耆等以生命財產保之乃解丙午回吉總辦濛江招墾濛地叢林蔽日人煙寥寥墾局茅屋數椽視事後行邊察知降隊隊長十登臣等仍爲不法回局不動聲色召之數其罪斃六人始具詳省憲深爲嘉許自是濛境無匪墾戶膺集丁未夏奉軍至濛輯

逃犯傷兵歸咎護墾隊搆成大獄時有吳上將祿貞方督辦渾春邊防間島交涉起欲覓熟悉延邊形勢者吉林民政司謝出魁福所著間島說略及土們江源流考以獻大奇之擬檄赴延隨辦界務而案累亟不可留後卒賴巡撫朱與吳力獲免議明年回吉歷充鑛政總辦密山墾務與東北劃界事宜窮歷深山四閱月著密山墾務管見五國城考生女真說諾雷行筆記上之巡撫陳加考以聞宣統元年擢知密山府時督隊官尹聲隆脅前守謀叛抵任立寅尹等六人於法在任三年荒僻之區漸成富庶調吉林縣瀕行商民感泣爲建祠樹碑到吉兼任旗務總辦民國三年授東北路觀察使未到任以疾終年五十有九著有習靜山房詩鈔及日記若干卷與其他諸作待梓子二長巽齡法政畢業次頤齡官少將

奎文 字星五魁觀察族姪父德昌性慈善同治初年屢歉每屆青黃不接時見貧民購糧不易乃開倉出糶躬約量不用槩遠來者與之食鄉里德之尤勤學問喜讀先正事略紀五種諸書奎文入庠應光緒乙亥鄉試以京旗官出印結索費奢乃憤而報捐

筆帖式籤分盛京戶部考取乙酉拔貢以州判用旋補實缺兼委主事歷充海運監督農田糧儲兩司掌案迭應鄉試一中副榜三取臚錄復補廣寧倉官甲午之役運糧出力以京部漢堂主事升用丙午充荒務提調卒於官年四十有六著有綠槐吟館詩鈔待梓方其讀書時嘗夢題壁絕句云從戎二十執戈爰百戰餘生膽氣疏飲馬長河休照影恐驚霜雪上頭顱其一生屢蹟名場蓋已預兆云嗣子春元

純

德

字紹文巴雅拉氏

譯姓白

滿洲鑲白旗人居邑西楊林子由制兵歷保記名協領

歷官盛京鑲白旗校政蓋州防禦小黑山路記佐領光緒甲午擢熊岳防守尉八月奉檄閱朝鮮時平壤戰衅已開韓廷漸貳於清至則折衝樽俎不辱國命而返十月旋任倉卒集制兵並悉索西丹一營委防禦永和校政依忠阿分帶之無何旅岫金復相繼失陷宋少保慶退守熊岳維時屢檄請軍憲救援悉無覆十一月屬境歸州鎮陷毅軍拔防守營口人心搖動敵遂薄城西偏依忠阿身被重創純德督兵射擊力窮城陷家人負之出朝命謫戍新疆時因戰守疲勞兼以老病子桂森孝廉請削職代父得旨俟

病愈再行起解未幾以疾終

桂 森 字秋嚴少時受業於董太史執同學有繆太史潤紱故孝廉榮勛師目爲三少年頗以遠到相期許由舉人改補盛京戶部筆帖式時值父失城獲譴自請削職代成得旨免代緩解家故不豐爲祿養計仍在部供職尋擢委主事戶部侍郎良弼深資倚畀遴委爲西流墾務總辦團荒肥瘠懸殊抵段後切實履勘持平丈放杜絕請託所有山帽水甸概留有餘墾戶感戴至今數十年猶稱頌弗衰焉清季國事日非爰著長白肇迹小史經人刊印並附舊著光山敵廬詩集民國三年卒六十有六歲

桂 馨 字月亭桂森從堂弟也生有雋才家貧無力就學而酷嗜博覽舉凡六經子史及醫卜星相一經涉獵皆有心得於兵家學尤寢饋焉年十七值旗署挑兵壯世家子弟方逃避之不暇已獨奮焉往充營口洋槍隊兵未四年得優保至候補佐領補錦州校政會盛京新練長勝營調充教習隸翼長堯懷德部下堯議編鴨排槍隊桂馨力言其非並謂此法緣粵匪登滬岸時官軍猝不及防權用獵民擊水鴨槍擊退行之陸地

種種不便編入軍制未免騰笑中外堯仍飭仿造試驗果不可用自此宿憾後因事中傷之幾罹大辟落職歸里甲午之役將軍依守遼陽上書陳兵事晉謁時抵掌而談幕佐皆爲之咋舌遂委充前軍管帶受壽統領長節制悒悒不得志謂人曰壽公之自用與堯懷德同吾又錯投路徑矣議和後果被裁抑鬱以終卒年七十有一

趙乃普 字識塵先世由樂亭遷遼居邑西小趙台生而穎異少負文名書法蒼秀由附生取光緒壬午優貢籤分陝西歷任寶雞韓城洵陽涇陽洋縣長安等縣三署武功特授岐山知縣陞延安鳳翔乾隴各府州潼關同知歷充發審局總辦禁煙局提調西安糧務北關釐務直隸豐玉灤十七屬土稅總辦光緒癸巳武闈鄉試同考官所至有清節循聲而尤以洵陽武功潼關延安爲最著洵陽地處山南刁悍難治履任時以除暴安良爲任夜批閱晝審理隨訊隨結案無留牘復於公暇批課獎士積穀備荒民甚德之武功道倉係屬旗餉二次署任值歲饑請蠲民賦稟駁往返致與道憲齟齬經撫院查實災重始准豁免此次爲民請命幾致獲咎光緒庚子刺隴州適全陝災乃捐廉籌

賑十數萬災黎賴以全活知潼關時兩宮迴鑾駐潼五日因支應咸當德宗稱之曰能有旨召見被中官沮之延安地控三邊轄十縣抵任後極力振刷有利必興有弊即革陝藩許子純嘗謂屬僚曰七府五州中如趙守者實罕其匹丙午夏丁父憂去岐山起復出守延安任滿簡放陝西高等檢察廳長清鼎革辭歸里衣箱書篋外別無長物負債纍纍棄祖產以償之旋被選省議會議員歷一二兩屆辯論是非無所撓屈綜計服官三十餘年爲代議士六年家本素封以宦遊而貧惟留遺愛在陝彼都人士至今稱之

宗 融 馬氏字序臣隸漢軍旗居城西北黃金屯由廩貢生歷充盛京將軍署內文案糧餉總理黑龍江墨爾根放荒委員民國初元署理開通縣知事敦品勵行廉隅自守又工書法前後歷差缺幾三十年家境清貧卒時幾無以爲葬

馮紹唐 字惺園居邑西西泗河由庶吉士授翰院檢討撰文處行走國史館纂修官記名道民國元年充遼陽稅捐總辦二年任奉天實業司長四年充興業銀行總辦旋充

官銀號會辦記名道尹國務院存記授四等嘉禾章庚子之亂由京歸里目擊地方糜爛乃同舉人劉春煥德彬請准盛京將軍增舉辦招撫遼海新廣四縣設立八局地方以安在實業司任內提倡開礦數處創興水利開水田二萬餘畝至今浦河一帶人食其利民國十一年卒年五十四歲

唐德謙 字益三他塔拉氏遼陽駐防滿洲鑲紅旗人居城東唐家堡子光緒庚子因地方不靖操辦鄉團嗣充東路保甲前哨哨官旋改充警察主計戊申歲充甯遠州自治研究所所長宣統三年奉天將軍趙委充巡防第七營管帶生性沈毅平居簡默寡言遇事果決有爲卒年四十有六

王興文 字造周居邑東孟胡屯留日陸軍經理學校畢業任東北陸軍團長奉直之戰山海關裏陣亡興文少負英銳之氣留東數年學術兩科卓有成就竟未得展其才惜哉

文職科第及學校出身者已見前茲不復贅

聯瑞 字輯五邑內人歷官河南洛陽縣知縣

王家驥 字紹良居邑內河南院世芳曾孫由供事歷官山東昌邑濰縣知縣

于沖漢 字雲章居邑內歷任東三省特別區行政長官中東鐵路督辦

海豐惠 字景僑官吉林臨江縣知事

朱斌奎 字吉甫官奉天蓋平縣知事

許桂恒 字泮香官黑龍江肇州縣知事

高文垣 字齊雲由北京譯學館畢業歷任吉林雙城奉天海城等縣知事

吉人 字靄峯居邑西劉二堡歷任直隸南皮東光玉田奉天桓仁等縣知事現任熱

河綏東縣知事

韓振甲 字乙亭居邑北韓夾河由附生高等警官畢業歷任中東路段長特別區第三

區區長

梁馨五 字馨五居邑北藍旗歷任吉林和隆縣警察所長

劉文魁 字星垣居邑東鶯房歷任直隸東明縣警察所長

羅綬卿 字加民居邑北連山台由奉天警官傳習所畢業歷任綏中縣警察所長奉天

警務處視察員現任營口縣警甲所長

孫克禮 字伯恭居邑北扒台由警察學校畢業歷任黑龍江肇州縣警察所長

隋葆光 字袖峯居邑南門外由警務學堂畢業任黑龍江警務處視察長警正

孫甲東 字日升由北京高等文官歷任直隸曲陽萍鄉雞澤等縣知事

吳延緒 字毓甫居邑北河工堡人由奉天高等文官任盤山縣知事

高迺濤 字蒙泉居邑城內三道街由附生考職巡檢奉天省署科長簡任職存記任鐵

嶺縣知事

武職

王承槐 字種三居邑內河南院世芳玄孫由武庠生投効吉林經延帥保以都司用歷

任吉林將軍衙門親軍營營官

劉占鰲 字仲三居邑東南亮甲山由武庠生任吉林敵愾軍後營營官

徐萬潤 字雨臣居邑東大安平歷任吉林敵愾後軍後營營官

李振致 字子鐸居本邑由行伍歷任奉軍二十七師礮團團長升任旅長兼鎮守使現任東北陸軍步兵十六師師長陸軍中將

應振復 字執禮居邑北邵二台由日本士官學校畢業歷任北洋第八師參謀長礮兵八團團長十六旅旅長陸軍中將兼湛威將軍十六混成旅旅長兼軍部總參議直隸馬蘭關總兵

富雙英 字耀天居本城由東洋陸軍畢業歷任東北陸軍二十二師師長鎮威軍第十軍副軍長京師警備總司令陸軍少將

熊墨林 字翰章世居西關由東三省講武堂畢業歷任東北陸軍三師參謀長代理鎮威十二軍軍長陸軍少將

董懷清 字靜泉居邑內三義廟由奉天講武堂畢業歷任東北陸軍騎兵二十三旅旅長

張復 字又騫居邑東達子堡任東北陸軍騎兵十一旅旅長

高紀毅 字任旃居邑南大甸子漢軍旗籍任東北陸軍二十七旅旅長

蕭顯揚 字振聲居邑南梨花峪由行伍歷任黑龍江陸軍團長

王大中 字仲樵居邑內四道街由日本陸軍經理學校畢業歷任陸海軍會計審查處

科長授陸軍一等軍需正東三省巡閱使署奉軍總司令部蒙疆經略使署副官處長

晉補陸軍軍需監總辦鎮威軍外交處長陸軍少將配受二等文虎章二等嘉禾章二

等大綬寶光嘉禾章二等四維章

劉蔭厚 字域豐由保定軍官學校畢業歷任衛隊旅七十七團團長

鍾萬福 字輯五居邑西劉二堡歷任陸軍二十八師百十團團長

周福成 字全五居邑北連山台由保定軍官學校畢業任東北陸軍步兵六旅第八十

團團附

李春溪 字博融居城東黑峪陸軍中校東北陸軍第五團團附

孫廣甲 字武忱居城南上堡由東三省講武堂畢業陸軍上校濱江鎮守使署參謀長

李錦芝 字蘭亭居城東大高嶺陸軍上校黑龍江督軍署顧問四等文虎章一等金色  
獎章

白玉麟 字書春居城西大螞蜂泡由東三省講武堂畢業陸軍中校代理團長現任陸  
軍第十二師參謀長

哈玉良 字蘊田居城東南甜水站由東三省講武堂畢業歷任鎮威軍三四方面聯合  
軍參謀

龍志啓 字雲飛居城北園由東三省講武堂畢業歷任熱河都統署參謀

王振岳 字漢武居城東南鷄官屯由奉天講武堂畢業陸軍中校東北陸軍第十師十

二旅副官長

趙魁榮 字星垣居邑西獐狼堡陸軍中校吉林督軍署副官

胡頤齡 字介眉居邑西小台子由清河陸軍學校畢業陸軍少將鎮威第十軍參謀長

綏張路警處長

應鴻倫 字子靜居邑東北邵二台由保定軍官學校畢業陸軍中校東北陸軍第八旅

參謀長

王錫嘏 字叔純居邑東石橋子由奉天講武堂畢業歷任陸軍十六師參議

夏永佩 字鍾三邑南媽媽街人由講武堂畢業歷職營長記名團長

孫廣延 字星橋邑南上堡人由講武堂畢業歷職營長